

Asun Wankláán Ání

Yohane

Lówanlín

1 ¹Asa ɔ́yí lebelin a, Asún ámu bu unv. Asún ámu mua Bulu bu unv. Asún ámu gyí Bulu.

Asún Ání Itehá Nkpa

²Asún ámu mua Bulu bu unv asa ɔ́yí lebelin. ³Musú Bulu lótsun bwe tógyít. Tɔ́tɔ́tɔ́ má unvá Bulu ló́bwe tsun mu ɔ́ma. ⁴Mutɔ́ nkpa itsú. Nkpa ámu tɔ́pú wanki ba ahá féé ní. ⁵Wanki anfi tɔ́wánkí oklúntɔ́, táme oklún mókúgyi músú ki.

⁶Bulu lówa oyin ɔ́kuá butetí mu Yohane^a sísí. ⁷Ɔ́leba bebláa ahá wanki amu iwí asún, méni ahá féé bóhɔ́ asún ámusu gyi. ⁸Megyí Yohane onutó gyí wanki amu. Mu mú wanki amu iwí asún ɔ́leba bebláa ahá. ⁹Ɔ́há ámúú ogyi wanki onutó, ɔ́tɔ́wánkí há ɔ́hagyíɔ́ha amu ɔ́bá ɔ́yít.

¹⁰Ɔ́bu ɔ́yí ánfítɔ́. Musú Bulu lótsun bwe ɔ́yí, táme ɔ́yí ánfítɔ́ atsiápú bumebi mu. ¹¹Ɔ́leba mu onutó ɔ́mátɔ́, táme mu pi bumɔ́hɔ́ mu. ¹²Táme ɔ́leha ahá ání bóhɔ́ mu, hɔ́ mu gyi féé ɔ́kpa ání bubwée Bulu abí. ¹³Amú Bulu abí bwe motsú ilíntɔ́, ntée nyankpusa apébwetɔ́, ntée oyin ɔ́wólí ɔ́kpasu. Mboún Bulu onutó ló́bwe amú mu abí.

¹⁴Asún ámu lébemlí nyankpusa, oletsiá anitɔ́. Awitɔ́le pú ɔ́nɔ́kwali sɔ́ɔ́n létsiá mutɔ́. Anulówun mu numnyam. Mu Si lówa mu numnyam amu, tsúfé Obí ɔ́kukúnú ɔ́kule pé ogyi há mu.

^a 1:6 Asú Ɔ́bɔ́pú Yohane

15 Yohane léle mu súná, tóí tsú mu iwí ɔ́bée, “Óni iwí asún neblí mbée, “Ọ́hà ámú obuo mi ɔ́bá ámu dwn mi, tsúfẹ́ ɔ́bu unu asa ɔ́kwí mí ” ní.

16 Mu awitɔ́le itsɔ́. Íni sù ɔ́de awitɔ́le tsɔ́tsɔ́tsɔ́ ánfí wa há aní fée ní. 17 Mosesu Bulu mbla ámu ná ɔ́leba, táme ɔ́nɔ́kwali mba awitɔ́le mú una aní Wíe Yesu Kristosu ɔ́leba. 18 Ọ́ha mɔ́kúwun Bulu kí. Obí ɔ́kúkúnú ɔ́kule pé, mu onutó ogyí Bulu, otsie Ọ́sí ámu gyɔ́pɔ́su, Ọ́sí ámu tehié kle mu asún ámu, nkule labláa aní alá Bulu gyí.

Asú Ọ́bɔ́pú Yohane Bulu Asún Ọ́kanda

(Mateo 3:1-12; Marko 1:1-8; Luka 3:1-18)

19-20 *Yudafɔ́ ahande ání bubu Yerusalem ɔ́wa Bulu igyí ahapú pú Lewifɔ́ Yohane wá bɛe buyéfíté mu bɛe, ma ogyí? Yohane mési asvansu ɔ́áín amú. Ọ́lele bláa amú ɔ́bée, “Megyí mígyí Kristo, (ọ́hà ámú Bulu ladá mu ofúli amu).” 21 Befíté mu bɛe, “Mómú fúgyí ma? Fúgyí *Elia?”

Ọ́lele mú ɔ́nɔ́ ɔ́bée, “Megyí mígyí Elia.”

Betrá fité mu bɛe, “Fúgyí Bulu ɔ́nɔ́sú ɔ́tɔ́ípú amú ɔ́bɛ́ba amú?”

Ọ́lele mú ɔ́nɔ́ ɔ́bée, “Ó-o.”

22 Mú bɛfité mu bɛe, “Ma fuhíé fúgyi? Bla aní, méní abéyɛ́bláa ahá ámú ɔ́wa aní ámu. Nkálí fúdeblí tsú fú onutó iwí?”

23 Yohane lópu asún ání Bulu ɔ́nɔ́sú ɔ́tɔ́ípú *Yesaia léblí tswí lé mú ɔ́nɔ́ ɔ́bée,

“Mígyí ọ́hà ámú ɔ́dekplón *dimbísú ɔ́bée,

‘Mlitswii aní Wíe ikpa ámu ha mu’ amu ní.”

24-25 Inu *Farisifɔ́ akvá ɔ́wa Yohane wá é bɛfité mu bɛe, “Ní megyí fúgyí Kristo amu, megyí fúgyí Elia ntée Bulu Ọ́nɔ́sú Ọ́tɔ́ípú amú ɔ́bɛ́ba amu é á, ntogyi sù fude ahá *asú ɔ́?”

26 Yohane léle mú ɔ́nɔ́ ɔ́bée, “Ntsu ndepubɔ́ ahá asú, táme ọ́ha ɔ́ku bu mlitɔ́ nfi, mluméyín mu. 27 Múgyí ọ́hà ání obuo mi ɔ́bá ní. Mmɔ́fun ání nésankí mu ntukuta ɔ́fé kpán.”

28 Asún ánfí fée léba Yordan ntsu ɔ́bun Betania wúlutɔ́. Inú Yohane létsiá bó ahá asú ní.

Bulu Okúfabi

29 Ɔyi kehe a, Yohane lówun ání Yesu ná ɔbá mu wá. Múú ɔlebláa ahá ámu ɔbéé, “Mlɩkɩ, Bulu *Okúfabi amu ɔbá á. Músú Bulu ɩtsun sí ɔyító ahá lakpan kíé amú ní! 30 Mu ɩwi asún neblí mbée, ‘Ɖku buo mi ɔbá. Ɖɔvɔn mi, tsúfé ɔbu ɩnu asa ɔkwúí m’ ní. 31 Mí onutó mmeyín mu, táme neba nde ahá asú ɔ, méni Israelfo bébi ɔhá ání ogyi.”

32 Yohane léblí ɔbéé, “Nowun *Ɖɛ Wankíhé amu, ɔlekplí tsú ɔsúsú fé abróɔma bogyonká musu. 33 Mí onutó mmeyín mu, táme Bulu lówa mí ɔbéé mbá ɔɔpu ntsu ɔbá ahá asú. Múlébláa mi ɔbéé, ‘Ɖhá ámúú fówun Ɖɛ Wankíhé amu ɔbéekplí tsú ɔsúsú bogyonká musu ámu ɔɔpu Ɖɛ Wankíhé amu ɔbá ahá asú ní.’ 34 Nawun ání ɩlaba mútó. Mú su nde mu ɩwi adánsɩe gyí mbée, mu gyí Bulu mu Bi ámu ni.”

Yesu Akasípú Agyankpapu

35 Mú ɔyi kehe a, Yohane mu mu akasípú abanyó besankí ba ɩnu. 36 Bréá Yohane lówun Yesu détsúvɔn a, ɔleblí ɔbéé, “Mlɩkɩ, Bulu *Okúfabi amu ná ɩnu á.”

37 Akasípú abanyó ámu bonu asún áni. Mú su bekplá buo Yesu. 38 Yesu lédamlí kɩ wun ání bobuo mu. Múú ɔlefíté amú ɔbéé, “Ntɔ mlídédunká?”

Befíté mu beɛ, “Osunápú, nkúnu futsie?”

39 Yesu léle mú ɔnɔ ɔbéé, “Mlɩba beki.” Mú su ayin abanyó ámu bobuo Yesu yéki mu otsiákpá. ɩbɔ́bwe fé ntúpwe ɔnɔ. Betsiá mu wá tá owí.

40 Ayin ámúú bonu asún ání Yohane léblí tsú Yesu ɩwi, bekplá buo Yesu amɔɔ ɔkule gyí Simon Petro mu pio Andrea. 41 Mú ɔma a, ɩɔ gyankpapuá Andrea lóɔbwe gyí, oloyódunká mu pio Simon, bláa mu ɔbéé, “Anɩlawun Mesia.” (Mú asɩ gyí, “Kristo”, ɔhá ámúú Bulu ladá mu ofúli amu.)^b 42 ɩnu ɔlekpa Simon ba Yesu wá.

^b 1:41 *Kristo* igyi Griiki ɔblí, *Mesia* é igyi Hebri ɔblí.

Yesu lékɪ mu díín, ɔ̀léblí ɔ̀béé, “Fúgyí Yohane mu bi Simon ni. Tsú nde púya a, bétɪ fú Kefa.” (Griiki ɔ̀blítɔ “Petro.” Mú asi gyí, “Butá.”)

Filipo Mva Nataniel Tɪ

43 Ɔ̀yí kehe a, Yesu lɔ̀bwe ɔ̀béé mɔ́yɔ Galilea ɔ̀mátɔ, olowun Filipo. Mú ɔ̀lébláa Filipo ɔ̀béé, “Buo ni.” 44 Filipo otsú Betsaida, Andrea mva Petro wúluto. 45 Filipo lówun Nataniel, ɔ̀lébláa mu ɔ̀béé, “Anulawun oyin á mú Mose lɔ̀wanlín mu iwi asún wá Bulu mbla ámutɔ, Bulu ɔ̀nɔ́sú atɔ́pú amu é bɔ̀wanlín mu iwi asún ámu. Mu dá gyí Yesu. Mu si gyí *Yosef, otsú Nasaret wúluto.”

46 Nataniel léfuté mu ɔ̀béé, “Itɔ yilé ku bétalí dalɪ tsu Nasaret wúluto?”

Filipo lébláa mu ɔ̀béé, “Ba afubeki.”

47 Bréá Yesu lówun Nataniel ɔ̀bá mu wá á, ɔ̀léblí ɔ̀béé, “Israelyin onutónutó ní. Afunu kuku ma mutɔ.”

48 Nataniel léfuté Yesu ɔ̀béé, “Nkálɪ lɔ̀bwe febi mí?”

Yesu léle mú ɔ̀nɔ́ ɔ̀béé, “Nowun fu bréá fubu pɔ̀ntɔ-oyí ámu asi unv, asa Filipo lébetɪ fú.”

49 Nataniel lébláa mu ɔ̀béé, “Osunápú, fúgyí Bulu mu Bi Israel Owie amu ni.”

50 Yesu lébláa mu ɔ̀béé, “Alɪ á mú nabláa fu mbée, nowun fu pɔ̀ntɔ-oyí ámu asi ámu sv fahogyi? Fówun ofúla ání idon íni.” 51 Yesu létrá bláa mu ɔ̀béé, “Ɔ̀nɔ̀kwali nde mli bláa, mlówun ání ɔ̀súsú lafínkí, *Bulu-abɔ̀pu buɔ̀de ɔ̀súsú yɔ́ yínkí bá Nyankpusa-Mu-Bi ámusu.”

Ɔ̀kátsiá Kana Wúluto

2 ¹ Eke saási a, betsiá ɔ̀ká Kana wúlu ání ibv Galilea ɔ̀mátɔ. Yesu mu yin bv unv. ² Betɪ Yesu mva mu *akasípú é mú asi. ³ Bréá amú ntá leta á, Yesu mu yin lébláa mu ɔ̀béé, “Butráa buma ntá.”

4 Yesu lébláa mu ɔ̀béé, “Amú yín, yéé megyí mí asún igyi o! Mí bré mɔ̀kúnyá fun.”

5 Mu yin lébláa wóyí ámutɔ asúmpú ɔ̀béé, “Mlɔ̀bwe dunka asúngyiasún ání ɔ̀bébláa mliɔ̀.”



Asúmpú amv besa búlá awvndi ámv féé. (Yohane 2:7)

⁶*Yudafɔ butɔfwí iwɔ amú amándíé ɔkpasu. Mú su bɔpu awvndi akpɔnkpɔɔnkpɔnti asie yáí wóyí ámvɔ. ⁷Yesu lébláa unv asúmpú amv ɔbéé, “Mlisa ntsu bula awvndi ámv féé.” Lélé besa. ⁸Unv ɔlebláa amú ɔbéé, “Mlisa ukv ya nkesu ɔkípu amv.” Besa ya mv. ⁹Ɔleda mú ɔnɔ á, uladámli bwé ntá. Omeyín ɔtínéá benya ntá ámv tsú. (Táme asúmpú amv mú buyin.) Unv ɔletɔ ɔká otsiápu amv ya utsétɔ, ¹⁰ɔlebláa mv ɔbéé, “Nta wankláán ɔhagyíɔha tegyankpá yáí. Ní bonu mú tá asa butɔpú múá uma ale ba. Táme fú mú fapú wankláán ámv yáí bɔfun séi.”

¹¹Unv gyí osúna gyankpapu ání Yesu lɔbwe ní. Ɔlobwe mú Kana ání ibu Galilea ɔmátɔ, púlé mv numnyam ɔwan. Uleha mv akasípú bɔhɔ mv gyi.

¹²Unv ɔma a, Yesu mvu mv yin, mv apíó pú mv akasípú bɔyɔ Kapernaum wúlutɔ, yétsiá unv nke kpalobí.

Yesu Bulu Ɔtswékpa Yɔ

(Mateo 21:12-13; Marko 11:15-17; Luka 19:45-46)

13 Bréá nkeá Yudafo bɔpɔgyi Israelfosu *Katsun Nke lowie wóyí tá á, Yesu lɔdu yɔ Yerusalem. 14 Ɖloɔyɔ *Bulu ɔtswékpa amu wunsunésú yówun ání ahá buɔe nnantswie, akúfa pú abróduma fe. Olowun aku é butsie mpúnúasi buɔe kɔba tsée. 15 Inu ɔlobwe mpli, wíé amútɔ, gyáa amúba mbwi ámu fée dáli. Olowutá kɔba atsépu amu mpúnú dá, dá amú kɔba sáín. 16 Múú ɔlebláa abróduma afepú ámu ɔbéé, “Mlile amú nfi! Mlumápu mí Sí wóyítɔ bwé mli ibiá ogyíkpa.” 17 Inúá uléba ali su á, mu akasípú amu bekaín Bulu asun wanlínhé anfisú. “Fú osúmkipá amu asún ihíé igyi mí asunbogya.”

18 Yudafo ahande amu beba Yesu wá befité mu beé, “Osúna mɔmu fɔbwe púsúná aní ání Bulu túmitɔ fúde ínu bwe?”

19 Yesu lébláa amú ɔbéé, “Mlɔbwie Bulu ɔtswékpa anfi, nɔpu nkensá yí mú.”

20 Yudafo ahande amu bebláa mu beé, “Nfi advana-sie kéké bɔpɔyi obu ánti. Mú fú mú fée, fɔpu nkensá yí mú?”

21 Táme mu nyankpusa-oyí iwɔ asún ɔdeblí, megyí Bulu ɔtswékpa amu. 22 Bréá Bulu lókusúba mu tsú afúlitɔ ɔma a, mu akasípú amu bekaín ání ɔleblí asún ánti. Mú su bɔho Bulu asún pú Yesu asun blíhé amusu gyi.

Yesu Yin Nyankpusa Kluntɔ

23 Yesu lɔbwe osúna tsɔtsɔtsɔ Israelfosu Katsun Nke ámutɔ bréá ɔbu Yerusalem, ahá tsɔtsɔtsɔ bowun. Mú su bɔho mu gyi. 24 Táme Yesu mɔpu ansí dínká amósú, tsúfé oyin alú amú fée bugyi. 25 Mehián ání ɔhaa ɔbebláa mu ɔha iwɔ asún, tsúfé mu onutó oyin asún ání ɔbu nyankpusa kluntɔ.

Yesu Mwa Nikodemo

3 1 *Yudafo ɔhande ɔku létsiá, butetí mu Nikodemo. Farisiyin ogyi. 2 Ɖleba Yesu wá eke ɔku onyé bebláa mu

ɔ́bée, “Osunápú, anyin ání Bulu lówa fú sísí fé ató osunápú. Tsúfé ɔ́haa méetalí bwé osúna anfi fúdeḅwe ánti, ní Bulu móbúo mu.”

³Yesu léle mú ɔ́nɔ́ ɔ́bée, “Ɖnɔ́kwali nde fú bláa, ɔ́haa méetalí nyá Bulu ogyi iwíe musu, nkéti balákwíi mu.”

⁴Nikodemo léfuté mu ɔ́bée, “Nkálí bélakwíi ɔ́há ání aladan? Ɖbétalí sánkí wíe mu yin iputo, ɔ́bélakwíi mu?”

⁵Yesu léle mú ɔ́nɔ́ ɔ́bée, “Ɖnɔ́kwali nde fú bláa. Ní bumelakwíi ɔ́ku tsun ntsu múa *Ɖɔ́e Wankíhéto á, ɔ́méetalí wíe *Bulu iwíegyí ámutɔ́. ⁶Ɖyulúv nkpa itsú nyankpusatɔ́, ɔ́ɔ́tɔ́ klé é itsú Bulu Ɖɔ́tɔ́. ⁷Mú su máha mú iwa fú wánwan ání nabláa fu mbée, ilehián ání bélakwíi mli. ⁸Afú tɔ́tsun yɔ́ ɔ́tínéá ideklé. Futonú mú nka, táme fumeyín ɔ́tínéá itsú pú ɔ́tínéá iyó. Ali kén igyi há ɔ́hagyíɔ́ha ání bakwíi mu tsú Ɖɔ́é ámutɔ́ ní.”^c

⁹Nikodemo léfuté mu ɔ́bée, “Ngya ntɔ́ asún ní?”

¹⁰Yesu léle mú ɔ́nɔ́ ɔ́bée, “Israelfɔ́ osunápú yilé fúgyi, mú fée fumɔ́kúnú asún ánti así? ¹¹Ɖnɔ́kwali nde fú bláa. Tɔ́a anyin iwí anidétɔ́i tsú, tɔ́a anilawun é iwí anidé adánsie gyí, táme mlutamaho aní asún ámu. ¹²Ní nebláa mli tɔ́a ide músú yɔ́ ɔ́yí ánti, mlimóhogyi a, nkáli ɔ́bɔ́we nebláa mli tɔ́a ide músú yɔ́ ɔ́súsú mboún mlóhogyi? ¹³Ɖhaa mɔ́kúdu yó ɔ́súsú unu ki, nkéti Nyankpusa-Mu-Bi ámutú olotsu unu ba amu.

¹⁴“Ali ámutú Mose lópu kɔ́bri iwo síán oyísú, tsú mú líi *dimbísú unu ámu a, ali kén ilehián ání béda Nyankpusa-Mu-Bi ámu mántá oyísú, tsú mú líi,^d ¹⁵méni ɔ́hagyíɔ́ha ání ɔ́lɔ́ɔ́ mu gyi obénya nkpa ání itamatá ní. ¹⁶Tsúfé dwé Bulu léhie dwé anyánpósa. Mú su ɔ́lɔ́ɔ́ mu Bi ɔ́kukúnú ɔ́kule pé ámu há, méni ɔ́hagyíɔ́ha ání ɔ́lɔ́ɔ́ mu gyi omóowu, mboún obénya nkpa ání itamatá. ¹⁷Bulu mɔ́pu mu Bi ámu sísí ɔ́yí ánti ɔ́bée, ɔ́bá begyi ahá asún, ɔ́ha ahá ipón, mboún ɔ́bée, ɔ́bá ɔ́lɔ́ɔ́ ahá nkpa.

^c 3:8 Ɖɔ́é múa afú lehan aba Griiki ɔ́blítɔ́. ^d 3:14 Mu oyikpalíhesu síán iwí asún ɔ́deblí.

18“Dhá ání ɔɔhɔ mu Bi ámu gyi lagi asu. Dhá ání ɔɔhɔ mu Bi ámu gyi a, Bulu lahá mu ipón dodo, tsúfé ɔɔhɔ mu Bi ɔkule pé ámu gyi. 19Alá ɔbéha ipón ámu gyí, wanku amu laba ɔyítɔ, táme ahá bɔdwe oklún dun wanku amu, tsúfé lalahe abwepó bugyi. 20Dhagyíha ání ɔɔbwé lalahe tolú wanku amu. Dtamakpókpe mantáa mú, tsúfé ɔde ifú nya ání mu bwehé béln ɔwan. 21Táme dhá ání ɔɔbwé yilé tehá wanku amu ɔwánkí wólí musu, méni ahá bówun ání Bulu apé ɔdebwe.”

Yesu Mva Asú Ɖɔpó Yohane

22Íni ɔma a, Yesu mva mu *akasípú bedali Yerusalem yó Yudea ɔmátɔ. Betsiá unu kpalobí, oletsiá bɔ ahá *asú. 23Alí bré ámutɔ á, Yohane é dé ahá asú bɔ Aenon nsáuntɔ, mantáa Salim wúlu. Tsúfé ntsu dada nsiné unu. Ahá betsiá yó mu wá, oletsiá bɔ amú asú. 24(Bumɔkúnyá kítá Yohane tswi obu ali bré ámutɔ.)

25Iwígyvráa iwí nwéengyí ku leba Yohane akasípú pú Yudayin ɔku nsiné. 26Inu Yohane akasípú bɔyɔ mu wá yébláa mu beɛ, “Osunápú, yéɛ fakáín oyin ámutú fúa munyɔ mlílétsiá Yordan bunkpa ɔbun, fegyí mu iwí adánsie wankláán ámusu? Ɖde ahá asú bɔ, ahá féé buɔe mu wá yɔ.”

27Yohane léle mú ɔnɔ ɔbéɛ, “Dhaa méetalí bwé tɔtɔ, nkétu Bulu lahá mu ɔkpa. 28Mli onutó mlétalí gyi mi adánsie ání nebláa mli mbéɛ, ‘Megyí mígyí Kristo amu, táme Bulu lówa mí gya mu nkpa.’ ” 29Inu ɔleha amú yébi ɔbéɛ, “Ɖká otsiápu bú mu ka. Ɖká otsiápu amu mu nyawie é tetsiá ɔká otsiákpá unu, méni ansí bégyi mu ní onú mu nyawie amu ɔme. Ali kén ansí de mí gyí séi ní. 30Mí atomabi béta wíé mu kletɔ.”

Dhá Ání Olotsu Ɖsúsú Ba

31Dhá ámutú otsú ɔsúsú ámu dun dhagyíha. Dhá ání otsú ɔsulósu é gyí ɔsulósu cha. Ɖsulósu asún ɔteblí, táme dhá ání otsú ɔsúsú dun dhagyíha. 32Otegyi tóá alawun pú tóá alanú iwí adánsie, dhaa tamahɔ mu asun blíhé. 33Táme dhagyíha ání ɔɔhɔ mu asun blíhésu gyi dé músú si ání Bulu

asún igyi ɔɔkwali. ³⁴Ɔhá ámuú Bulu lówa ámu telé Bulu asún blí, tsúfé Bulu ɔɔpú Ɔhé ámu búlá mutɔ. ³⁵Ɔsí ámu ɔɔdwé mu Bi ámu, alapú túmi féé wá mu ibutɔ. ³⁶Ɔhagyíɔha ání ɔɔhɔ mu Bi ámu gyi bu nkpa ání utamatá. Ɔhagyíɔha ání ɔɔhɔ mu gyi má nkpa ání utamatá. Bulu isubití é idun musu.

Yesu Mva Samariayintse Ɔku

4 ¹*Farisifo bonu ání Yesu dé abúopu nya, bó amú *asú dun Yohane. ²(Táme megyí Yesu onutó dé amú bɔ. Mu *akasípú dé amú bɔ.) ³Bréá Yesu lébi ání Farisifo ámu banú asún ánfí á, ɔledali Yudea ɔmátɔ yínkí yó Galilea ɔmátɔ. ⁴Táme lehián ání ɔbótson *Samariafɔ ɔsulúsu.

⁵Yesu lóyówie Sikar ání igyi Samaria wúlu kutɔ. Wúlu anfi bu mantáa ɔsulúsu kvá *Yakob lópvhá mu bi *Yosef bímbí ámu. ⁶lnú Yakob ibún bu ni. Ɔkpa ámu bu ifó. Mú su Yesu lótsutsúa obowie unv á, ɔlapián mu. Mú su oletsia ibún ámu asi. Ali bré ámutɔ á, ɔlabwé fé ɔpawísú.

⁷lnv á, Samariayintse ɔku léba ntsu ɔsakpá. Yesu lókulí mu ɔbéé, “Nobwíí ipa, ha mí ntsu annu.” ⁸Ali bré ámutɔ á, Yesu akasípú bɔyɔ wúluto yóhɔ atogyihe.

⁹Yudafɔ butamapú ibi da Samariafɔ nwe núu ntsu. Mú su ɔtsi ámu léfuté Yesu ɔbéé, “Yudayin fugyi, mí é Samariayintse ngyi. Nkáli igyi sù fude mí ntsu kulí?”

¹⁰Yesu léle mú ɔnɔ ɔbéé, “Ní fuyin Bulu atokiehé pú ɔhá ání ɔde fú ntsu kulí á, teki fókulí mu, ɔbéha fú ntsu ání itehá nkpa.”

¹¹Ɔtsi ámu lébláa mu ɔbéé, “Ani sí, fumedé ɔfé, ibún ánfutɔ é bu oklí. Nkónv fénya ntsu ání itehá nkpa? ¹²Fódun aní náin Yakob ání olokwi ibún ánfí há aní, mva mu abí pú amú mbwí bonu ntsu mútɔ?”

¹³Yesu léle mú ɔnɔ ɔbéé, “Ɔmewóli bélékítá ɔhagyíɔha ání otonu ibún ánfutɔ ntsu. ¹⁴Táme ɔhagyíɔha ání obónu ntsuá néha mu a, ɔmewóli méétrá kutá mu ekekeke. Ntsu ámuú néha mu amv ibédamlí ntsu ɔwíkpa mutɔ ání ibélnv ha nkpa ání utamatá.”

15 Ɔtsi ámu lébláa mu ɔbéé, “Ani sí, ha mí ntsu ánfɪ ku, méni ɔmewóli méétrá kítá mí, mméétrá ba nfi é besa ntsu.”

16 Yesu lébláa mu ɔbéé, “Yeti fú kúlu amliba.”

17 Ɔtsi ámu léle mú ɔnɔ ɔbéé, “Mma okúlu.”

Yesu lébláa mu ɔbéé, “Ɖnɔkwali igyi fablí ání fuma okúlu. 18 Tsúfé fatsía akúlu tse nu ki. Mégyí fú kúlu gyí oyin ámuó fúa munyɔ mluná séi ámu é. Fawá ɔnɔkwali.”

19 Múú ɔtsi ámu lébláa mu ɔbéé, “Ani sí, nawun ání Bulu ɔnɔsú ɔtɔípú fugyi. 20 Ani anáin Samariafɔ bosúm Bulu ibu ánfɪsu, táme mli Yudafɔ mú mliaa Yerusalem kóún lehián ání ɔhagyíɔha obósum Bulu.”

21 Yesu lébláa mu ɔbéé, “Ɖtsi, hɔ mí asún ánfɪsu gyi. Bré ku béba ání ahá buméétrá súm Ɖsí ámu ibu ánfɪsu ntée Yerusalem. 22 Mli Samariafɔ mluméyín ɔhá ání mlidésu. Ani Yudafɔ mú anyin ɔhá ání anidésu, tsúfé Yudafɔsu una nkpahɔ́ leba ɔyítɔ́. 23 Bré ibá, ilafon ta ání Bulu asúmpú anɔkwaliɔ bósu Ɖsí ámu ɔhétɔ́ pú ɔnɔkwali. Tsúfé ahá ánfɪ odu Ɖsí ámu dédunká ɔbéé busúm mu ni. 24 Ɖhɛ Bulu gyí. Mú su ilehián ání ahá ání butosúm mu bósu mu ɔhétɔ́ pú ɔnɔkwali.”

25 Ɔtsi ámu lébláa mu ɔbéé, “Nyin ání Mesia^e, (ɔhá ámuó Bulu ladá mu ofúli amu) ɔbéba. Ní ɔbá á, ɔbéle asúngyíasún asi súná anɪ.”

26 Múú Yesu lébláa mu ɔbéé, “Mí ánfɪ nde fú asún bláa anfi gyí Kristo amu ni.”

27 Inu akasípú amu besankí tsú wúluto ba ɔɔtu amó. Uɔwa amó wánwan ání bawun Yesu mua ɔtsi bulí budetɔ́. Táme amótɔ́ ɔkuku metálí fité ɔbéé, “Ntɔ fudedunká tsú mu wá, ntée ntogyi sú fúa ɔtsi ámu mlidétɔ́?”

28 Ɔtsi ámu lési mu ɔlɔ́ yáí unu, yínkí yɔ́ wúluto yébláa ahá ɔbéé, 29 “Mliiba amlibeki oyin ɔkuvá alabláa mi tɔ́á nabwé ki féé. Mliilahogyi mliaa, megyí Kristo amu ni?” 30 Mú su ahá bedali tsu wúlu amuto beki Yesu.

31 Alɪ bré ámuto á, mu akasípú ámu buɔe mu kokóli beɔ, ogyíí atɔ́.

^e 4:25 Griikifɔ tétí Mesia beɔ Kristo.

³²Táme ɔlebláa amú ɔbéε, “Mbu t́á négyi, mluméyín mú iwí kúkukú.”

³³Mú su akasípú amu befíté aba beε, “Ntée ɔku labeha mu ɔku alagyi?”

³⁴Yesu lébláa amú ɔbéε, “Mí atogyihe gyí ání nóbwe t́á ɔhá ámúbú ɔɔwa mí sísí ámu ɔbéε mbwée, ammo mú ɔnó. ³⁵Yée mlteblí mltaa, ‘Tsra ana pé lasí ayó t́nbi bófun?’ Táme nde mli bláa mbée, mlitsu ansí kí adɔbúbú amuɔ, ayó ámu ulabli fun t́n. ³⁶Bude mu atínpu akɔ ka dodo. Bude mú t́n yaí há nkpa ání itamatá. Mú su ansí bégyi adupú ḿa atínpu amu féé ekewóle. ³⁷Mú su ɔnɔkwali igyi buteblí beε, ‘ɔku todú, ɔku é tetun.’ ³⁸Nɔwa mli mbée mlyétun ayóá mlumóyɔ mú odukpá. Aha bambá lóyɔ mú iwí agyómá, ulawá labi há mli.”

³⁹Samariaf́a bubu wúlu amuɔ tsɔtsɔɔtsɔ bɔhɔ Yesu gyi, adánsiε ámúbú ɔtsi ámu légyi suná amú ɔbéε, “Abláa mi t́ogyít́a nabwé mí nkpatɔ féé” ámu su. ⁴⁰Íni su bréa beba Yesu wá á, bokokóli mu beε, otsiá amú wá. Yesu létsiá unu nkenyó.

⁴¹Yesu asun blíhé su Samariaf́o ámu tsɔtsɔɔtsɔ é belahɔ mu gyi. ⁴²Bebláa ɔtsi ámu beε, “Megyí f́ú asún ámu śú anulétrá hɔ mu gyi ngya o. Aní onutó anulanú, anlawun ání lélé oyin ání gyí ɔyít́ó Nkpa ɔhópu amu ni.”

ɔhande ɔku Mu Bi Ilo Tsa

⁴³Nkenyó ámu ɔma a, Yesu lénatí ý Galilea ɔmát́. ⁴⁴(Tsúfé mu onutó olowun blí ɔbéε, “Butamabú Bulu ɔnósú ɔt́óipú mu onutó ɔmát́.”) ⁴⁵Bréa olowie Galilea a, unfo bɔhɔ mu atúu, tsúfé amú onutó bɔyɔ Yerusalem Yudaf́osu *Katsun Nke ámu ogyíkpá. Mú su bowun t́á ɔɔbwe unu féé.

⁴⁶Yesu létrá yinkí ý Galilea ɔmát́, Kana wúluto, ɔt́iné ámúbú ɔledamlí ntsu bwé ntá ámu. ɔmá ɔhande ɔku tsie Kapernaum wúluto. ɔbu obi yinhé ɔkúv́a ɔda ɔdelɔ. ⁴⁷Bréa ɔhande amu lónu ání Yesu latsú Yudea ba Galilea a, olegya mu ɔkpa yókokóli mu ɔbéε, mu bi yínhé lawú tá, ɔkplí ba Kapernaum, ɔbetsa mu ilo ha mu. ⁴⁸Yesu lébláa mu ɔbéε, “Mú su ní mlumókúwun osúna a, mlumóhɔ mi gyi ekekéke?”

49 Ǫmá ɔhande amu lébláa mu ɔbéé, “Owíé! Ní aní ayabi mɔwa ɔsa á, kebi ámu obówu.”

50 Yesu lébláa mu ɔbéé, “Yɔ! Fú bí ámu obénya nkpa!”

Oyin ámu lóhɔ asún ámúb Yesu lébláa mu amusu gyi, oleyinkí ɔyɔ wóyí. 51 Bréá ɔyɔ á, mu asúmpú beba befia mu, bláa mu beé, “Fú bí ámu lanyá nkpa.”

52 ɪnu ɔlefíté amú bréá iwɪ lówa mu bi ámu ɔnlɪn. Bebláa mu beé, “Owísó ámu lési mu ígye ɔpa ɔɔɔ-kuletɔ.” 53 ɪnu á, ɔlekaín ání alɪ bré ámutɔ kén Yesu lébláa mu ɔbéé, mu bi ámu obénya nkpa ní. ɪnu su mva mu wóyítɔfɔ fée bɔhɔ Yesu gyi.

54 ɪnu gyí osúna nyɔɔsiá Yesu lóbwɛ bréá olotsu Yudea ba Galilea ni.

Tsukule Osínpu Ǫku ɪlo Tsa


5 1 Asún ánfɪ ɔma a, Yesu lódu yɔ Yerusalem *Yudafɔ Bulusúm nke ku ogyíkpa. 2 Bɔpwe buntíí wá wúlu amu. Bokwi ibún ku mantáa buntíí amu ɔkpa ɔnɔ kvá butetí mú Akúfa Ǫtsónkpa. Butetí ibún ámu Betesda *Hebri ɔblítɔ. Beyi mbu anu bómlí mú. 3-4 Alɔpu tsɔtsɔtsɔ bubun ibún ámu asu mbu ánfɪtɔ. Amótɔ aku bugyi ansibi abwiepú, abɔ pú tsukule asínpu.^f 5 Oyin ɔkvá alasin tsukule ní advasa-kwe (38) kéké da unu. 6 Bréá Yesu lówun mu a, olowun ání alalɔ, dí unu wá ɔpá. Mú su ɔlefíté mu ɔbéé, “Fudeklé fee iwɪ iwá fú ɔnlɪn?”

7 Tsukule osínpu amu léle mú ɔnɔ ɔbéé, “Owíé, ní bowúli ntsu ámutɔ á, mma ɔhá ání obótsu mí wá mútɔ. Nótutsúá ambɔbwɛ á, ɔku lagyankpá wíé mútɔ dodo.”

8 Yesu lébláa mu ɔbéé, “Kusu! Tsu fú ɔklan, afvnati!” 9 ɪnɔnɔnɔnɔ oyin ámu iwɪ lówa mu ɔnlɪn, ɔlɔkusú tsú mu ɔklan, wá natí bi.

Alɪ eke ámu igyi Yudafɔ *Ǫkpúnú Ǫdaké. 10 Mú su Yudafɔ ahande beka oyin ámúb Yesu latsá mu ɪlo ámu ansítɔ, blí

^f5:4 Mútɔ yée 4 bu nwulú dada amu akutɔ: *lbu nu bu unu á, Bulu-ɔbɔpu tobowulí ntsu ámutɔ. ɪnu su butsie unu bvygo mu. Tsífé ní ɔbá bowulí mú á, fúá fegyankpá wíé mútɔ á, futenyá ɪlɔtsá.*



Yesu mva tsukvle osínpu amv ni. (Yohane 5:6)

bee, “Nde igyi Ɔkpúnú Ɔdaké. Anu mbla meha ɔkra ání fósará fú ɔklan.”

11 Ɔlebláa amú ɔbéé, “Ɔhá ámú ɔletsa mí ulo ámv lébláa mí ɔbéé, ‘Tsu fú ɔklan, afonatu.’”

12Mú su befité mu bæe, “Ma lébláa fu ɔbée, futsúu fú ɔklan afunati?”

13Oyin ámu mébu ɔhá ání ɔletsá mu ɔlɔ, tsúfé ahá buhié butso unu, Yesu lófwi wá amútó.

14ɔma a, Yesu lóyówun mu *Bulu ɔtswékpa unu. Mú ɔlebláa mu ɔbée, “Yée fawun ání ɔlɔ lawá fú ɔnɔn. Mátrá bwe lakpan, ménu múá ɔdɔn ɔnu méeba fusu.”

15Oyin ámu léyébláa Yudafo ahande amu ɔbée, Yesu létsa mu ɔlɔ. 16Ínuá Yesu dé ntobí ánfɔ odu bwe ɔkpónú ɔdaké su á, Yudafo ahande amu bɔwa mu kpekpée bi. 17Táme Yesu lébláa amú ɔbée, “Mí Sí mókúsí agyómá yɔ. Mú su mí é mmókúsí.”

18Mu asun blíhé anfi su á, Yudafo ahande amu bekle ání bómɔ mu ɔkpagyíɔkpasu. Tsúfé megyí ɔkpónú ɔdaké mbla ámu nkule túbun su, mboún ɔleblí ɔbée, mu si gyí Bulu, ilosuná ání mua Bulunyo bugyi kékée.

Bulu Téhá Mu Bi Ámu Túmi

19Yesu léle mú ɔnɔ ɔbée, “ɔnɔkwali nde mli bláa. Mí Bulu mu Bi ánfɔ onutó mméetalí bwé tɔtɔ mí iwisu. Tśá nowun ání mí Sí débwe á, mú ntɔbwé. 20Tsúfé mí Sí tɔdwé mí, otosúná mí ɔtśá mu onutó ɔdebwe féé. Inn! ɔbɔwa mli wánwan ání obósuná mí múá ɔdɔn alɔ. 21Alɔ ámú mí Sí tɔkúsvá ahá tsú afúlitɔ, há amú nkpa ámu a, alɔ mí é ntehá ahá ání ndeklé nkpa ní. 22Mí Sí tamagyi asún há ɔpón, támé alapú asúngyí féé wá mí ɔbutɔ, 23ménu ɔhagyíɔha obóbu mí fé alɔ otobú mí Sí ámu. ɔhá ání ɔtamabú mí tamabú mí Sí ámú ɔlɔpɔ mí sísí ámu é.

24“ɔnɔkwali nde mli bláa mbée, ɔhagyíɔha ání otonú mí asún, ɔtɔhɔ ɔhá ámú ɔlɔwa mí sísí ámu gyi, bu nkpa ání utamatá. Bulu méegyí mu asún, há mu pón, tsúfé aladálɔ lowutɔ ba nkpatɔ dodo. 25ɔnɔkwali nde mli bláa. Bré ku ɔbá. Bré ámu ɔlawúna fun ání ahá ání bugyi fé aha wuhés bónu Bulu mu Bi ámu ɔmɛ. Amúá bonu mú bénya nkpa.

§ 5:25 Ahá ání bawú ɔhétó.

26 Tsúfé mí Sí búv túmi, ɔtehá nkpa. Alí kén alahá mí ánfí ngyi mu Bi ánfí túmi, ɔbéé nháa ahá nkpa ní. 27 Alahá mí túmi ɔbéé, ngyíi ahá asún, tsúfé mígyí Nyankpusa-Mu-Bi ámu ni. 28 Asún ánfí imáwa mli wánwan. Bré ku ibá, afúli féé bónu mí ɔme, 29 kúsú. Amúá ɔɔbwe yilé bélakúsú, nyá nkpa ání itamatá. Amúá ɔɔbwe laláhe a, négyi amú asún, há amú ipón.”

30 “Mméetalí bwé ɔtɔɔɔ mí iwɔsu. Asún ání nonú tsú mí Sí wá á, mú ntɔpúgyí asún. Mú sù ntegyi asún ɔɔɔkwali su ní. Tsúfé ntamabwé tóá mí onutó ndeklé, mboún tóá ɔhá ámúbú ɔlwa mí sísí ámu tekle.”

Yesu Iwɔ Adánsɛ Wankláán Agyípó

31 Yesu lóyɔ músú blí ɔbéé, “Ní mí onutó negyi mí iwɔ adánsɛ á, mlumɔ́hɔ mú ání ɔɔkwali igyi.^h 32 Bulu é tegyi mí iwɔ adánsɛ. Nyin ání mí iwɔ adánsɛ ámúbú odegýí amu igyi ɔɔkwali. 33 Mlilawá abí sísí Yohane. Alabláa mli ɔɔkwali amu. 34 Mí mú á, mmehián anyánpósa adánsɛ. Mboún nde mli asún ánfí bláa, méní Bulu ɔɔhɔ mli nkpa. 35 Yohane asun blíhé ɔbwe fé ɔkandíe ání idewankí. Mú su mlilótsulá gyi mú ɔdwe kpalobí. 36 Mbu tóá itegyi mí iwɔ adánsɛ, idun Yohane klé amu. Agyúmá ámúbú mí Sí lawá ɔbéé mbwée mɔ mú ɔnɔ, nde mú bwe ámu dé adánsɛ gyi ání mɔlɔ́wa mí sísí. 37 Mí Sí ámúbú ɔlwa mí ámu onutó lagyi mí iwɔ adánsɛ. Mlumɔ́kónu mu ɔme, mlumɔ́kówun mu é ki. 38 Mlumɔ́hɔ mu asún wá mli kluntɔ, tsúfé mlumɔ́hɔ mí ámúbú ɔlwa sísí ámu gyi. 39 Mlúkíá mlénya nkpa ání itamatá tsú Bulu asun wanlínhé amutɔ. Mú sù mli ansí lapé, mlidé mú kasí ní. Mí iwɔ adánsɛ Bulu asun wanlínhé amu idegyí. 40 Táme mlilakíná mí wá bá, méní mlénya nkpa ámu.

41 “Mmedédunká mbéé, ahá bukánfu mí, 42 tsúfé nyin mli dodo. Nyin ání mlitamadwé Bulu tsú mli kluntɔ. 43 Naba mí Sí dátɔ, mlumɔ́hɔ mu. Táme ní ɔha bambá ɔbá mu onutó iwɔsu á, mlɔ́hɔ mu. 44 Mlitekleá mlékanfú aba, táme

^h 5:31 Mose mbla lósuná ání ahá abanyó ogyí adánsɛ.

mlitamabó mbódí ání Bulu ɔkule pé ámu ɔkánfu mli. Nkálí ɔbɔbwe mlɔ́hɔ mi gyi? ⁴⁵Mlumáki mliaa, néle mli ulá mí Sí ansító. Mose amúú mli ansí idun musu mliaa ɔbɔ́hɔ mli nkpa ámu mboún ɔbéle mli ulá Bulu ansító ní. ⁴⁶Ní lélé mlɔ́hɔ Mose asúnsú gyi a, teki mlɔ́hɔ mí asúnsú gyi, tsúfé mí iwu asún ɔɔwanlín tswi. ⁴⁷Táme íniá mliumɔ́hɔ tóá ɔɔwanlín tswísv gyi a, nkálí ɔbɔbwe mlɔ́hɔ mí asun blíhésu gyi?"

Ahá Mpím-nu Atogyihe Ha

(Mateo 14:13-21; Marko 6:30-44; Luka 9:10-17)

6 ¹Íni ɔma a, Yesu mua mu *akasípú befa Galilea ɔpúá butetí mú Tiberia amu yó mú ɔbun. ²Ɔɔɔm betsiá buo mu, tsúfé ɔde alɔpu tsa wánwansu. ³Mua mu akasípú bɔɔɔ yó okúku kusu, yétsiá asi unu. ⁴(Alí bré ámutɔ á, Yudafo nkeá bópygyi Israelfosu *Katsun Nke ámu ulafun ta.) ⁵Unu Yesu lótsu ansí fúá wun ání ɔɔɔm kponkponkponnti bebá mu wá. Múú ɔlefuté Filipo ɔbéé, “Nkúnú abénya atogyihe hɔ ha ahá ánfí bégyi?” ⁶(Yesu léblí asún ánfí púsɔ Filipo ki, tsúfé oyin tóá ɔbɔbwe dodo.)

⁷Filipo léle mú ɔnɔ ɔbéé, “Ní apú tsra kwe ɔkóká hɔ atogyihe kúráá á, umóɔfun ání okugyíɔku obénya kpalobí gyí!”

⁸Simon Petro mu pio Andrea, ogyi akasípú amutɔ ɔkule lébláa Yesu ɔbéé, ⁹“Oyimbi ɔku dé bodobodo apín pútúpútú anu pú ntsutso iye bwáhé anyɔ. Táme ntu íni bɔbwe ahá tsɔtsɔtsɔ ánfí?”

¹⁰Yesu lébláa mu akasípú amu ɔbéé, “Mliha amú abutsiatsia asi.” Ahá ámu féé betsiá ífású. Ayin ání bubu amútó bɔbwe fé mpím-nu (5,000). ¹¹Múú Yesu lóhɔ bodobodo amu, dá Bulu ipán, ɔleha beye mú há ahá amúú butsie unu ámu. Alí kén ɔɔbwe ntsabi buáhé amu é ní. Amútó okugyíɔku lénya alá odeklé. ¹²Begyi mwe sian. Yesu lébláa akasípú amu ɔbéé, “Mlikula síanhe amu, méni umóɔbwe atɔ yintáhé.” ¹³Lélé, ɔtɔsí síanhe amúú benya tsú bodobodo anu ámutɔ ámu. Uɔbulá alakpá dúanyɔ kéké.

¹⁴Ahá ámu bowun osúna anfi Yesu labwé ánfí. Mú su beblí beé, “Léle, oyin ánfí gyí Bulu ɔnɔsú ɔtɔpú amúú bowanlín

mu iwí asón wá Bulu asóntó bée, óbéba oyító ámu ní.” ¹⁵Yesu lówun ání ahá ámu babwé agywun bée, béba bekítá mu ówunlínító yáí mu iwíe. Mú su mu nkule óléladó yó nkpa sí amú.

Opusu Natí

(Mateo 14:22-33; Marko 6:45-52)

¹⁶Bréá owí lópon a, Yesu akasípú beklí ba Galilea opu onó. ¹⁷Owí latá, táme Yesu mókúyínkí bótú amú. Mú su bótú wíe óklontó, budéfa boyó Kapernaum. ¹⁸Afú kponkpontu ku léba idetsúun, opu amu lówa dabi. ¹⁹Alí bré ámutó á, akasípú amu baplá óklun amu yó fé máli asa ntéé ana. Inu bowun ání Yesu ná opu amusu óbá amú wá. Mú su ifú lekítá amú. ²⁰Táme Yesu lébláa amú óbée, “Mí ní, mlumánya ifú!” ²¹Inu bótú mu wá óklun amutó ansigyísó. Ilotsutsúa iwanki amú á, óklun amu lawíe otsubúnó, ótíné amúb boyó ámu.

Yesu Dunká

²²Óyí kehe a, ódom amúb besi bubu opu amu óbun unu ámu bowun ání óklun kuku itráa melíí unu. Múá tekí ulí unutó akasípú amu bowie náíí ní. Bowun ání Yesu mówie mútó asa benatí. ²³Mú óma a, nklun aku lótsu Tiberia wúlutó belí mantáa ótíné amúb begyi bodobodo amúb Yesu léda Bulu ipán póhá amú ámu. ²⁴Ódom amu bowun ání Yesu lanatí unu, mu akasípú amu é buma unu. Mú su bótú wíe nklun amutó yó Kapernaum, bude Yesu dunká.

Bodobodoá Itehá Nkpa

²⁵Bréá ódom amu boyówun Yesu ntsu óbun unu á, befíté mu bée, “Osunápú, bré mómú fobowie nfi?”

²⁶Yesu lébláa amú óbée, “Ónókwali nde mli bláa. Megyí osúna amúb ndebwe mlidéwúun amu su mligyá mí ókpa. Mboún bodobodo amúb neha mli, mlulégyí mwe ámu su. ²⁷Mlumáwun ipian atogyihe ání iteyíntá su. Mboún mlwun ipian múá ibétsiá yó, íbéha nkpa ání utamatá, ání mí, Nyankpusa-Mu-Bi ánfí néha mli su. Tsúfé mí mí Sí Bulu lahie nsu ání mbu ókpa há mú.”

28 Befité Yesu bæe, “Gyuma mɔmɔ abwée isuna ání anidé tʒá Bulu tekle bwe?”

29 Yesu léle mú ɔnɔ ɔbé, “Tʒá Bulu déklé ɔbée mlibwée gyí, mliɔ mí ánfɪ ɔlɔwa sísí ánfɪ gyi.”

30 Inu befité Yesu bæe, “Osúna mɔmɔ fɔbwe abówun, ménu abɔɔ fu gyi? Ntɔ fɔbwe? 31 Anɪ anáin begyi *mana dimbí ámusu. Bɔwanlín mú wá Bulu asún ámutɔ bæe, ‘Mose léha amú atʒá ilotsu ɔsúsú bá begyi.’ ”

32 Mú Yesu lébláa amú ɔbé, “Ɖnɔkwali nde mli bláa. Megyí Mose léha mli atogyihe amu tsú ɔsúsú. Mí Sí léha mli bodobodo onutónutó ámu tsú ɔsúsú. 33 Tsúfé bodobodo ání Bulu tehá gyí mí ánfɪ natsú ɔsúsú bá, nebá beha ɔyító ahá nkpa ánfɪ.”

34 Ahá ámu bebláa mu bæe, “Owíé, tsia ha anɪ bodobodo anfi brégyíbré, tsú séi púya.”

35 Yesu lébláa amú ɔbé, “Mígyí bodobodo amú itehá nkpa ámu ni. Akún méekítá ɔhá ání ɔleba mí wá ekekekeke. Ɖmewúlí méekítá ɔhá ání ɔlɔɔ mɪ gyi é ekekekeke. 36 Fé alíá nebláa mli á, mliɔlawun mɪ, táme mliɔkúɔ mɪ gyi bɔfun séi. 37 Ɖhagyíɔha ání Ɖsí ámu léha mí ɔbéba mí wá. Mméegya ɔhagyíɔha ání ɔleba mí wá. 38 Tsúfé mmotsu ɔsúsú ba mbée, nebá ɔɔbwe tʒá ndeklé. Mboún tʒá ɔhá amú ɔlɔwa mí sísí ámu déklé ɔbwekpá neba. 39 Tʒá ɔhá amú ɔlɔwa mí sísí ámu déklé gyí, ahá amú ɔlɔpɔhá mí ámutɔ ɔkuku mádali mí ibi. Mboún nkúsva amú féé tsu afúlitɔ eke tráhe amu. 40 Tʒá mí Sí ámu tekle gyí, ɔhagyíɔha ání olowun mí, mu Bi ánfɪ, ɔ mɪ gyi obénya nkpa ání utamatá. Nókúsúba mu tsú afúlitɔ eke tráhe amu.”

41-42 Ínɪá Yesu léblí ɔbé, “Mígyí bodobodo amú notsu ɔsúsú ba amu ni” su á, Yudafo ámu ɔɔwa mu wuntí bi. Bæe, “Megyí *Yosef mu bi Yesu amu ni? Animéyín mu si muv mu yin? Ɖkpa mɔmɔ sú ɔdeblí ɔbé, ‘Ɖsúsú notsu neba?’ ”

43 Yesu lébláa amú ɔbé, “Mlusi wuntí mli wolewɔle. 44 Ɖhaa méetalí ba mí wá, nkétɪ mí Sí amú ɔlɔwa mí sísí ámu lakpá mu ba mɪ. Mí é nókúsúba mu tsú afúlitɔ eke tráhe amu. 45 Bulu ɔnɔsú atɔpú amutɔ ɔku lówanlín tswi

ɔbée, ‘Bulu obósuná ahá fée ató.’ Ɖhagyíɔha ání alanú mí Sí asún, kásí mú tsú mu wá teba mí wá. ⁴⁶Ɖhaa mǔkúwun Ɖsí ámu ki. Mí ánfí notsu Bulu wá bá anfi nkule láwun mu ki. ⁴⁷Ɖnɔkwali nde mli bláa. Ɖhagyíɔha ání ɔlɔɔ mu gyi bu nkpa ání itamatá. ⁴⁸Mígyí bodobodoá itehá nkpa ní. ⁴⁹Íniá mli anáin begyi mana *dimbísú óó á, amú fée bowu. ⁵⁰Táme bodobodo anfi gyí múa ulatsú ɔsúsú bá, méni ɔhagyíɔha ání obégyi mú móowu ní. ⁵¹Mígyí bodobodo amúbú ntehá nkpa, natsú ɔsúsú ba amu ni. Ɖhagyíɔha ání ogyi bodobodo anfi obétsiá nkpa, omóowu ekekeeke. Mí ɔyulúv gyí bodobodo amu. Mú nési há, méni ɔyítǔfɔ bénya nkpa ní.”

⁵²Ínu Yudafo ámu benya asún anfi Yesu lablí ánfí iwu ɔblí. Amú wulewule begyi aba nwéen bee, “Nkáli oyin ánfí ɔbétalí pú mu ɔyulúv há aní ɔbée agyíí?”

⁵³Yesu lébláa amú ɔbée, “Ɖnɔkwali nde mli bláa. Ní mlumégyi mí, Nyankpusa-Mu-Bi ánfí ɔyulúv, nu mí obugya a, mlumá nkpa ání itamatá kukvuku mlɔ. ⁵⁴Ɖhá ání olegyi mí ɔyulúv, nu mí obugya bu nkpa ání itamatá. Nókusúba mu tsú afúlitɔ eke tráhe amu. ⁵⁵Tsúfě mí ɔyulúv igyi atogyihe onutó, mí obugya é igyi atonuhe onutó. ⁵⁶Ɖhá ání ogyi mí ɔyulúv, nu mí obugya tsie mutɔ, mí é ntsie mutɔ. ⁵⁷Mí Sí Ɖkɔankpavu amu lówa mí sísí. Mu súbu nkpa. Mú su fúbá fegyi mi a, mí su fú é fubu nkpa. ⁵⁸Mígyí bodobodo onutóá notsu ɔsúsú ba ni. Mli anáin begyi mána, táme bowu. Ɖhá ání ogyi bodobodo anfi mú obétsiá nkpa ání itamatá.”

⁵⁹Yesu léblí asún ánfí bréá ɔde ató suná Kapernaum, Yudafo *offakpa.

Nkpa Ání Itamatá Asún

⁶⁰Yesu abúopu tsɔtsɔtsɔ ámutɔ aku bonu asún ánfí á, beblí bee, “Atosunáhé ánfí mú bu ɔnlun o! Ma ɔbétalí hɔ mó?”

⁶¹Yesu lówun ání mu abúopu amutɔ aku bude wunti ání alablí alí su á, ɔlefté amú ɔbée, “Asún ánfí ilahan mli? ⁶²Múmú ní mlowun Nyankpusa-Mu-Bi ámu ɔyó ɔtínéá olotsu ba me, nkáli mlóbwe? ⁶³Bulu Ɖjé ámu téhá nkpa.

Nyankpusa ɔwunlín mú á, kpaali ígyi. Asún ánfí nde mli bláa anfi itsú Ɖɛ́ ámú ɔtehá nkpa ámu wá, ⁶⁴táme mlto aku bumɔho mósú gyi.” Yesu lówun amúá bumɔho mósú gyi pú ɔhá ání ɔbéle mu há yáí dodoodo. ⁶⁵Ɖletrá bláa amú ɔbé, “Ínu sù nebláa mli mbée, ɔhaa méetalí ba mí wá, nkéti mí Sí lakpá mu ba mí” ní.

⁶⁶Tsú eke ámu a, Yesu abúopu amu tsɔtsɔtsɔ beyinkí mu ɔma, bumetrá buo mu. ⁶⁷Mú su Yesu léfité mu akasípú dúanyɔ ámu ɔbé, “Mli é mlidékléá mléyinkí mí ɔma lóó?”

⁶⁸Simon Petro lébláa mu ɔbé, “Owíé, ma wá abóyɔ? Fú wá asún ání itehá nkpa ání itamatá bu. ⁶⁹Anulahogyi, anulabí ání fúgyí Ɖha Wankíhé amúú fotsú Bulu wá ámu nu.”

⁷⁰Ínu Yesu lébláa amú ɔbé, “Mli ahá dúanyɔ nele, táme mlto ɔku gyí ɔbunsám!” ⁷¹(Simon Iskariot mu bi Yuda ɔde á. Tsúfé ogyi akasípú dúanyɔ ámutɔ ɔkule. Mu ɔbéle mu há ní.)

Yesu Mva Mu Apio Yinhé

7 ¹Mú ɔma a, Yesu létsiá kí Galilea ɔmátó. Omekleá ɔbóyɔ Yudea ɔmátó, tsúfé Yudafo ahande amu buɔe mu tée abumɔ mu. ²Táme Yudafo *Kantankpatɔtsiá Nkegyí lafun. ³Mú su mu apio yinhé bebláa mu be, “Nati yɔ Yudea nke ámu ogyíkpá, méni fú abúopu amúú bubu unu ámu é bówun ofúla ání fudebwe. ⁴Ɖhá ání odekléá ahá bubú mu gyumagyihé tamaráin iwí. Ínúá fúde ntobíá igyi alí bwe á, wuna le mú suna, ɔyí féé abuwun.” ⁵(Mu apíó ámu kúráá bumɔho mu gyi. Mú su bebláa mu alí ní.)

⁶Ínu su Yesu lébláa amú ɔbé, “Bréá nóyɔ unu mɔkúnyá fun. Mli mú mlétalí yó unu brégyíbré. ⁷Ɖyítɔfo buméetalí lú mli, táme mí mú buɔe mí lu, tsúfé nde amú ulá le. ⁸Mliyo nke ámutɔ. Mí mú mmɔkúnyá yó, tsúfé mí bré mɔkúfun.” ⁹Yesu léblí asún ánfí tá á, olesi tsiá Galilea ɔmátó.

Yesu Kantankpatɔtsiá Nke Ámu Ogyíkpá Yɔ

¹⁰Táme bréá Yesu apíó ámu benatí yó nke ámu ogyíkpá a, mu é oleráin iwí yó unu. ¹¹Yudafo ahande amu bodunká mu nke ámu ogyíkpá, buɔe ahá fité be, “Oyin ámu me?”

12Ɔɔm amu beblí asún tsɔtsɔtsɔ nklobító tsú Yesu iwí. Aku beɛ, “Ɔha wankláán ogyi.” Aku é beɛ, “Ɛkekeke, ɔde ahá mlé.” 13Táme amútsɔ ɔhaa metálí blí mu iwí asún kúklú ahá abunu, tsúfé buɔe Yudafo ahande amu ifú nya.

14Bréá bowie nke ámu nsuné á, Yesu lódu wíé *Bulu ɔtswékpa wunsunésú unu yéfi ató suná así. 15Mu atosunáhé lobwie Yudafo ahande amu ɔnó. Mú su befité aba beɛ, “Oyin ánfí mókókásí ɔwulú yó nkpá. Nkálí ulɔbwe asa ɔlebi ɔwulú ahí?”

16Yesu léle mú ɔnó ɔbéɛ, “Megyí mí wá atosunáhé anfi itsú. Itsú Bulu wá. Múlówa mí sísí. 17Ní ɔku dékléá ɔbɔbwe Bulu apé á, obówun ní atosunáhé anfi itsú mí wá ntée Bulu wá. 18Ɔhá ání ɔde mu onutó asún blí dé mu numnyam dunká. Táme ní ɔku todúnká numnyam há ɔhá ání ɔlɔwa mu sísí á, ɔnɔkwalɔpu ɔhá ámu gyí. Ɔtamawá afunu. 19Yéɛ Mose lópu mbla ámu ba mli a? Táme mlitɔ ɔkuku médé mósú gyi. Ntogyi su mlidékléá mlómɔ mí?”

20Inu ɔɔm amu bebláa mu beɛ, “*Ɔɔe laláhe bu futɔ! Ma dékléá ɔbómɔ fú?”

21Yesu lébláa amú ɔbéɛ, “Ofúla kule pé nɔbwe *ɔkpónú ɔdaké, mli féé ɔnó lobwie mli. 22Mose lówa mbla há mli ɔbéɛ, mlítún *keté. (lbu mútsɔ ání megyí Mose lótsɔ keté tún, mli anáin léfi mú así.) Yéɛ mú sù mlitetun ahá keté ɔkpónú ɔdaké ní a? 23Ní mlidé keté tún ɔkpónú ɔdaké, ménu mlumɔkúsú líí Mose mbla ámusu á, ntogyi sù mlilanyá ɔbló mísú mlíaa, natsá nyankpusa kéín ɔkpónú ɔdaké? 24Mliyo asúntó wankláán, asa amlíha ipón. Mliyo ɔnɔkwali gyi asún.”

Yesu Iwí Nwéengyí

25Yerusalemfo aku befité amú iwí beɛ, “Megyí oyin ánfí Yudafo ahande buɔedunká abumɔ ní? 26Megyí mu líí ahátɔ ɔɔetɔí, amútsɔ ɔkuku mékpla mu a? Ntée ulawánkí amú ání mɔgyí *Kristo, (ɔhá ámúú Bulu ladá mu ofúli amu) ní? 27Oyin ánfí mú a, aní féé anyin ɔtínéá otsú, táme ní Kristo ámu ɔbá á, ɔhaa méébi ɔtínéá otsú.”

28Bréá Yesu bu mósú ɔde ató ámu suná Bulu ɔtswékpa wunsunésú unu á, olotsu ɔnó fúá blí ɔbéɛ, “Mliyin mi,

mlyin otínéá notsú, táme megyí mí onutó túmisu neba. Onokwalipu ohá amúw ɔlowa mí sísí ámu gyí. Mluméyín mu. ²⁹Táme mí mú nyin mu, tsúfé mulówa mí sísí. Mu wá notsu ba.”

³⁰Ínu bekle abukíta mu, táme bumɔpu ibi da mu, tsúfé mu bré mɔkúfun. ³¹Táme amúw ahá tsotsɔwtsɔ ɔɔhɔ mu gyi. Mú su befuté beɛ “Ní Kristo amu ɔbá á, ɔbétalí bwé osúna dun mú ánfɔ oyin ánfɔ débwe?”

Yoh

Bɔwa Bɛɛ Bukíta Yesu

³²Bréá *Farisifɔ ámu bonu ání ɔɔm amu buɛ Yesu iwɔ asún blí nklobítɔ á, amúa Bulu *igyí ahapú dehen amu bɔwa Bulu ɔtswékpa agyópu beɛ bukíta Yesu. ³³Ínu su Yesu lébláa amú ɔbéɛ, “Ílasí nke kpalobí pé nétsiá mlí wá. Mú ɔma a, néyinkí yɔ ohá amúw ɔlowa mí sísí ámu wá. ³⁴Mlódunká mí, táme mlumóowun mi. Mluméetalí ba otínéá mbu é ekekekeke.”

³⁵Yudafɔ ahande amu befuté aba beɛ, “Nkúnú oyin ánfɔ obótu ɔkpa yɔ, su abódunká mu anumóowun mu? Ntéɛ odekléá ɔbɔyɔ Griikifɔ awúlu amúw anɔ pí badásáín yɔ músú ámusu, ntéɛ obóyósuná Griikifɔ ámu atɔ? ³⁶Asún ánfɔ ɔdeblí é asɔ mé? ɔbéɛ, ‘Mlódunká mí, táme mlumóowun mi. Mluméetalí ba otínéá mbu é.’ ”

Nkpa Ntsu

³⁷Nke ámu eke tráheá ígyi eke títriu á, Yesu lókusú líí kplun blí ɔbéɛ, “Ní ɔmewóli de ɔku á, ɔbá mí wá obonu ntsu. ³⁸Ohagyíɔha ání ɔɔhɔ mi gyi a, ‘Nkpa ntsu bɔwɔ dalɔ mutɔ.’ Alí ɔɔwanlín wá Bulu asún ámutɔ ní.” ³⁹(*ɔɔe Wankíhé amúw Bulu ɔbéha ahá ání bɔhɔ mu gyi amu iwɔ asún ɔdeblí. Alɔ bré ámutɔ á, ɔɔe Wankíhé amu mɔkúnyá ba, tsúfé Bulu mɔkúnyá wá Yesu numnyam.)

Ahá Ámutɔ Leye

⁴⁰Bréá ɔɔm amu bonu Yesu asun blíhé anfi á, amúw aku beblí beɛ, “Lélé, Bulu ɔnɔsú ɔɔwɔpú amúw anɔdé mu ɔkpa kí amu ni.”

⁴¹Aku é bɛɛ, “Kristo amu ni!” Táme amúto aku é beblí bɛɛ, “Yé megýí Galilea ɔmátó Kristo amu obótsu o. ⁴²Bɔwanlín wá Bulu asún ámutɔ bɛɛ, Owíe *Dawid abusuantɔ Kristo amu ɔbédalí tsu. Bɔkwíí mu Betlehem, Dawid wúlutɔ.” ⁴³lna Yesu iwí asún ánfí su ukulebwe metsiá amúto. ⁴⁴Amúto aku bekle abukita Yesu, táme ɔhaa ɔmópu ibi da mu.

Yesu Máhogyi

⁴⁵Ɖma-ɔma a, Bulu ɔtswékpa agyópu amúto bɔwa sumbí ámu besankí ba Bulu igyí ahapú dehen pú Farisifo ámu wá. Befité agyópu amu bɛɛ, “Ntogyi su mlumékutá mu ba?”

⁴⁶Bele mú ɔnɔ bɛɛ, “Ɖhaa mɔkútɔ́í fé oyin ánfí kí!”

⁴⁷Farisifo ámu befité amú bɛɛ, “Mú su oyin ámu lamlé mli é. ⁴⁸Mlulawun ɔhande ntée Farisiyin ɔku laho mu gyi kí? ⁴⁹Ekekeke! Ɖɔm anfi bɔmeyín Mose mbla ámu iwí ɔto. Mú su Bulu ɔlwí amú.”

⁵⁰lnu Farisifo ámutɔ ɔkule, ogyi Nikodemo amúto ɔɔyɔ Yesu wá onyé ámu léfíté amú ɔbéɛ, ⁵¹“Ani mbla leha ɔkpa ání abéha ɔku ipón asa abéfíté mu ɔnɔ́to asún nú?”

⁵²Befité mu bɛɛ, “Galileayin fú é fúgyi? Kí Bulu asún ámutɔ wankláán. Fówun ání Bulu ɔnɔ́sú ɔtoipú ɔkukukuku móotsu Galilea ɔmátó.” ⁵³[lnu amú féé benatí yó wóyító.

Ɖtsi Ɖku Mbuatɔ Pú Mu Kitá

8 ¹Bréá ahá amu bedasáín á, Yesu lódu yó Nfo-nyíbu ámusú. ²Mú ɔyi kehe bake a, oleyinkí ba Bulu ɔtswékpa wunsunésú unu. Ahá ámu féé beba mu wá. Mú su oletsíá asi, olefi asi ɔde amú ató suná. ³Bréá ɔdetóí á, *Farisifo pú Mose *mbla asunápú amu bekpa ɔtsi ɔkuá bakítá mu, ɔde mbuatɔ ba belí amú ansító. ⁴Múú bebláa Yesu bɛɛ, “Osunápú, bakítá ɔtsi ánfí mbua ɔtokpá. ⁵Mose Mbla ámu léblí ɔbéɛ, adáa atsi ánfí odu abwi mɔ. Nkálí fudeblí tsú asún ánfí iwí?” ⁶Asúnklé sù befité mu asún ánfí, abuyɔto mu ha ahande. lnu Yesu lóbun, pú osrebi ɔde ató wanlín ɔsolúto.

¹8:1 *Nfo-nyíbu* igyi obubwí kuá ibi mantáa Yerusalem, butetí mú Olifbu.

⁷Bréá butráa bude asún ámu fité plá á, olobwií tsíá, bláa amú ɔbéé, “Mluto ɔhá ání ɔmɔkúbwé lakpan ki ogyánkpa da ɔtsi ánfí ibwi.” ⁸Ɔleblí mú alí á, oleyinkí bun ɔde mu atɔ wanlín ɔsulúto. ⁹Bréá ahá ámu bonu mu asún ánfí á, ɔɔwa natí ikule-kule bi, tsú ahandesu ɔɔtu nyebísú. Ilebesi Yesu mu ɔtsi ámu nkule ɔbun nsiné unu. ¹⁰Yesu lóbwíí tsíá, ɔlefíté ɔtsi ámu ɔbéé, “Ɔtsi, nkí ahá ámu me? Ɔkuku mésián ání ɔbéha fú ipón?”

¹¹Ɔtsi ámu lélé mú ɔnɔ ɔbéé, “Owíé! Ɔkuku méha mí pón o!” Mú Yesu lébláa mu ɔbéé, “Ibu alé! Mí é mméeha fú ipón! Nati, mátrá bwe lakpan.”^j

Ɔyítɔ Wanki

¹²Ínu ɔma a, Yesu léyinkí bláa Farisifo ámu ɔbéé, “Mígyí ɔyítɔ wanki ni. Ɔhagyíɔha ání obuɔ mi obénya wanki ání íbéha mu nkpa, oméésin oklúntɔ ekekeke.”

¹³Ínu á, Farisifo ámu bebláa mu beé, “Nfólí tamakánfú mu iwí. Fumɔkúblí tɔto.”

¹⁴Yesu lébláa amú ɔbéé, “Ní mí onutó nde mí iwí adánsie gyí ó á, ɔɔkwali igyi. Tsúfé mí mú nyin ɔtínéá notsú pú ɔtínéá nɔyɔ. Táme mluméyín ɔtínéá notsú pú ɔtínéá nɔyɔ. ¹⁵Anyánkpuása asúngyí ɔkpasu mlitegyi asún tsun, táme mí mú ntamagyi ɔhaa asún. ¹⁶Ní negyi asún ó á, ɔɔkwali ɔkpasu negyi mú tsun. Tsúfé megyí mí nkule tegyi mú. Mía mí Sí ámú ɔɔɔwa mí sísí ámu nyo tegyi mú. ¹⁷Ɔwanlín wá mlí onutó Mbla ámutɔ beé, ‘Ní adansifo abanyɔ beblí asun kua kule a, amú asún íbu mútɔ.’ ¹⁸Mí onutó ntegyi mí iwí adánsie. Mí Sí lówa mí sísí. Mu é otegyi mí iwí adánsie.”

¹⁹BeFITÉ mu beé, “Nkúnú fú sí bu?”

Yesu lélé mú ɔnɔ ɔbéé, “Mluméyín mí wankláán, mluméyín mí Sí ámu é. Ní mlyin mi wankláán á, teki mlébi mí Sí ámu é.”

²⁰Yesu léblí asún ánfí bréá ɔde atɔ suná Bulu ɔtswékpa tswutswi adáka otsiákpá. Táme ɔhaa mékutá mu, tsúfé mu bré mɔkúnyá fun.

^j7:53-8:11 Ima Griikifo nwolú dada amu akutɔ.

Yesu Ɔsúsúyɔ

21 Yesu létrá bláa amú ɔbéɛ, “Mí mú nɔyɔ. Mlódunká mí. Mlówu wá mli lakpantɔ. Mluméetalí ba ɔtínéá nɔyɔ.”

22 YudaƆo ahande amu befuté beɛ, “Mó ɔbómɔ mu iwɪ, sù ɔdeblí ɔbéɛ, mluméetalí ba ɔtínéá nɔyɔ?”

23 Yesu léle mú ɔnɔ ɔbéɛ, “Mli mú mlotsú ɔyí ánfɪtɔ, táme mí mú notsú ɔsúsú. Ɔyí ánfɪtɔƆo mliɔyí. Mmegyí ɔyí ánfɪtɔyin mí mú ngyi. 24 Mú sù nde mli bláa mbée, mlówu wá mli lakpantɔ ní. Mlówu wá mli lakpantɔ, ní mliumóhógyi ání ‘Mígyí ɔhá ámúú mbée ngyi ámu.’ ”

25 Befuté mu beɛ, “Fúgyí ma?”

Yesu lébláa amú ɔbéɛ, “Ɔhá ámúú ntebláa mli yáí mbée, ngyi ámu kén ntráa nde mli bláa a. 26 Mbu asún tsɔtsɔɔtsɔɔ néblí tsú mli iwɪ púhá mli pɔn. Táme ɔnɔkwaliƆu ɔhá ámúú ɔlɔwa mí sísí ámu gyí. Asún ání nonu tsú mu wá nde mli ɔyítɔƆo bláa.”

27 Imɔwankí amú ání mu Si ámúú ɔbu ɔsúsú ámu iwɪ asún ɔde amú bláa. 28 Mú su Yesu lébláa amú ɔbéɛ, “Ní mledá Nyankpɔsa-Mu-Bi ámu mántá *oyikpalíhesu, tsú mú líí á, mlówun ání ‘Mígyí ɔhá ámúú mbée ngyi’ ámu. Mlébi ání ntamabwé ɔtɔɔtɔ mí onutó túmitɔ. Múá mí Sí lópuwá mi ɔnɔ á, mú nteblí. 29 Ɔhá ámúú ɔlɔwa mí sísí ámu buo mi. Ɔmɔkúyínkí mí ɔma, tsúfé tɔá itegyí mu ansí nɔɔbwé brégyíbré.”

30 Inu ahá ámúú bonu mu asún ánfɪtɔ tsɔtsɔɔtsɔɔ bɔhɔ mu gyi.

Abraham Abí-aná

31 Yesu lébláa YudaƆo ámúú bɔhɔ mu gyi amu ɔbéɛ, “Ní mlobuo mí atosunáhé a, mliɔyí mí akasípú lélé. 32 Mlébi ɔnɔkwali amu. Ɔnɔkwali amu ibéha mlégyi iwɪ.”

33 Beblí beɛ, “Abraham abí-aná anɔgyí. Anumókúbwé ɔhaa nkpábi ki. Mú ntogyi sù fúde anu bláa fée, ‘Mlégyi iwɪ?’ ”

34 Yesu léle mú ɔnɔ ɔbéɛ, “Ɔnɔkwali nde mli bláa. Ɔhagyíɔha ání ɔɔɔbwé lakpan á, ogyi lakpan ɔkpábi. 35 Ɔkpábi

tamatsiá mu wie wóyí yó, obí tetsiá mu si wóyí yó. ³⁶Mú su ní Bulu mu Bi ámu ɔhá mlegyi iwí á, múmú mlulagyi iwí fée. ³⁷Nyin ání Abraham abí-aná mligyi, táme mlidékléá mlómó mí, tsúfé mlumóhó mí atosunáhé. ³⁸Tsá nowun tsu mí Sí wá ndeblí. Mli é asún ání mlílonu tsú mli sí wású mlidégýí.”

³⁹Bebláa mu beɛ, “Ani sí gyí Abraham.”

Yesu lébláa amú ɔbéɛ, “Ní Abraham abí mligyi á, teku mli bwehé leltan Abraham. ⁴⁰Mlidékléá mlómó mí, tsúfé nde mli ɔɔkwaliá nonu tsú Bulu wá bláa. Abraham móbwe alí! ⁴¹Mli sí bwehé mlidébwe.”

Bebláa Yesu beɛ, “Megyi mbua ɔɔkwali kwíí ani. Bulu onutó gyí ani Sí. Anumá ɔsí ɔkoku tsia mutɔ.”

⁴²Yesu lébláa amú ɔbéɛ, “Ní mli Sí gyí Bulu á, teku mlutɔdwé mí, tsúfé mu wá notsu ba. Múlówa mí sísí. Megyi mí onutó túmitɔ neba. ⁴³Ntogyi sú mlumédé mí asun blíhé asi nu? Mlumédé mú asi nu, tsúfé mí asún de mli asutɔ wóɔ. ⁴⁴ɔbunsám gyí mli sí. Mú su mlutekleá mlóbwe tsá mli sí tekle. Ahá ɔmɔpú ogyi tsú nfiásí. ɔtamabuo ɔɔkwali. Mú su ɔɔkwali kuku ima mutɔ. Ní ɔwá afunu a, mu tsiátɔ ɔwan ɔdele, tsúfé ofunupu ogyi. Mvgyi afunupu fée ɔsí ní. ⁴⁵Táme nteblí ɔɔkwali. Mú su mlitamahó mí asúnsú gyi ni. ⁴⁶Mlutɔ ma ɔbétalí súná ání lakpan ɔbwepú ngyi? Ní nde ɔɔkwali blí á, mú ntogyi mlumóhó mu gyi? ⁴⁷ɔhá ání otsú Bulu wá teyáá asu nú mu asún. Mli mú mlímótsú mu wá. Mú su mlitamayáá asu nú mu asún ní.”

Yesu Mva Nanáin Abraham

⁴⁸Yudafɔ ámu bebláa mu beɛ, “Ní ablí aniaa Samariayin fugyi, *ɔɛ laláhe bu futɔ á, anilawá afunu?”

⁴⁹Yesu lébláa amú ɔbéɛ, “ɔɛ laláhe ma mítɔ. Ntobú mí Sí, táme mli mú mlitamabú mí. ⁵⁰Mmedé mí iwí numnyam wa. ɔha ɔku bu uná ɔde mú dunká há mí. Mvgyi asún ogyípú wankláan ámu ni. ⁵¹ɔɔkwali nde mli bláa. ɔhagyíha ání otegyi mí atosunáhésu omóowu ekekekeke.”

⁵²ɩnu Yudafɔ ámu bebláa mu beɛ, “Séi ánfu mú á, anilawun ání lélé ɔɛ laláhe bu futɔ! *Abraham mva Bulu

ἄνθρωπος ἀκούει μου βρωμί. Τάμε φύ μου φουδβλί φεε, ἡαγυῖα ἄνι οτεγυῖ φύ atosunáhésu omóowu ekekekeke. ⁵³ Aní náin Abraham lówu. Fúki φεε φudun mu? Bulu ἄνθρωπος ἀκούει μου ἔ bowu. Nkálí φύδε φύ ιωι kí?”

⁵⁴ Yesu léle mú ἄνθρωπος ἡβέε, “Ní ἡῶά mí ιωι numnyam a, kpaali ígyi. Mí Sí gyí ἡά ἄνι ἡῶά mí numnyam. Mu mludéblí mltaa ogyi mli Bulu ní. ⁵⁵ Ibu mótó ἄνι mímeyín mu, táme mí mú nyin mu. Ní neblí mbéε mmeyín mu a, nabwé ofunupu fé mli. Mí mú nyin mu, ntegyi mu asónsú. ⁵⁶ Mli náin Abraham lénya ansigyí ἄνι mówun mí bábi. Olowun mú ἔ, ansí legyi mu.”

⁵⁷ Yudafo ámu bebláa mu beε, “Fumḗkúhḗ nfí aduenu (50) kúráá, mú φεε fotu Abraham?”

⁵⁸ Yesu lébláa amú ἡβέε, “Ἐἡkwali nde mli bláa. Mbu unu asa ḗkwí Abraham.”

⁵⁹ Yesu lénya blí ali pé, ahá ámu ḗkwilá abwi beε abutswi da mu ḗ. Táme Yesu lóbwe híéé, dálí Bulu ἡtswékpa wunsínésú unu.

Ansibi Obwiepú Ḍku Tsa

9 ¹ Eke ḗku Yesu mua mu akasípú buna ḗkpatḗ, bowun oyin ḗkwá ḗkwí mu ansibi obwiepú. ² Yesu akasípú amu befuté mu beε, “Osunápú, ma lakpan sú ḗkwí oyin ἄnfi ansibi obwiepú? Mu onutó lakpan su lóó, ntéε mu akwípú?”

³ Yesu léle mú ἄνθρωπος ἡβέε, “Megyí mu ntéε mu akwípú lakpan su ḗkwí mu ansibi obwiepú. Mboún alíá Bulu ἡbéle mu túmi súná tsun mu ἡḗ ámutḗ su. ⁴ Ulasí kpalobí owí ἡbéta. Dhaa méetalí trá yḗ agyómá. Mú su ilehián ἄνι abḗyḗ agyómá ámutḗ ἡά ámutḗ ḗḗwa mí sísí ámu lḗwa mí ἡβέε nyḗḗ amu. ⁵ Iníá nenyá mbu ḗyí ἄnfitḗ á, mígyí ḗyí ἄnfitḗ wanki.”

⁶ Bréá Yesu lébláa amú asún ἄnfi tá á, olotu atsunó tswi ḗsulótḗ, ḗḗpu osrebi tsíá ιε, títi mú tan ansibi obwiepú ámu ansíbisu. ⁷ Múḗ ḗḗbláa ansibi obwiepú ámu ἡβέε, “Natu yḗfwí ansító Siloam paatḗ.” (Siloam asi gyí, “Ḗḗwa mu

sísí.”) Oyin ámu lóyófwi ansító yínkí ɔbá wóyí á, ɔde ató wúun.

⁸Mu aba pú ahá ání butowun mu ɔde ató kulí befité bee, “Megyí oyin ánfí tetsiá kulí ató bré ámu ní?”

⁹Amótó aku bee, “Mu ní!” Aku é bee, “Ó-o, lían ɔlelian mu.”

lnu oyin ámu onutó léblí ɔbéé, “Mí ní.”

¹⁰Befité mu bee, “Nkálí ɔlobwe asa fude ató wúun ngya?”

¹¹Ɔlele mú ɔnó ɔbéé, “Oyin ámú butetí mu Yesu amu lóbwe ɔdiba tan mí ansíbisu. Mú ɔlebláa mi ɔbéé, nnáti yɔfwi ansító Siloam paatitɔ. Nɔyófwi, mú nde ató wúun a.”

¹²Befité mu bee, “Nkónó ɔbu?” Mú ɔlele mú ɔnó ɔbéé, “Ohwée.”

Farisifo Ansibi Obwiepú Ámu Asón Futé

¹³lnu bekpa oyin ámú tɛki ogyi ansibi obwiepú ámu yáa Farisifo wá. ¹⁴Eke ámú Yesu lóbwe ɔdiba púbwíí mu ansíbi amu igyi *ɔkpónú ɔdaké. ¹⁵Mú su Farisifo ámu belafíté oyin ámu alá ɔlobwe asa ɔde ató wúun. Ɔlebláa amú ɔbéé, “Ɔdiba ɔɔputan mí ansíbisu, nɔyófwi ansító. Mú nde ató wúun ngya a.”

¹⁶Farisifo ámu aku beblí bee, “Megyí Bulu ɔha oyin ámú ɔlobwíí mu ansíbi amu gyí, tsúfé ɔtamagyi ɔkpónú ɔdaké mbla ámusu.”

Táme aku é befité bee, “Nkálí lakpan ɔbwepú ɔbétalí bwé osúna anfi odu? Asón ánfí su bumetrá bwe kule.”

¹⁷Mú su belafíté oyin ámu bee, “Fée mulóbwíí fú ansíbi. Amansu fubu blí tsú mu iwí?”

Oyin ámu léle mú ɔnó ɔbéé, “Bulu ɔnósú ɔtáipú ogyi.”

¹⁸Yudafɔ ahande amu bumohogyi ání lélé, bɔkwíí mu ansibi obwiepú asa séi ɔde ató wúun, kpéfun bréá beti mu akwíipú ba. ¹⁹Befité amú bee, “Mlí bí ámú mlíaa, mu ansíbi lobwie asa mlíɔkwíí mu amu ní? Nkálí ɔlobwe asa ɔde ató wúun ngya?”

²⁰Mu akwíipú amu bele mú ɔnó bee, “Aniyin ání aní bí ní. Aniyin ání aníɔkwíí mu ansibi obwiepú. ²¹Táme alá ɔlobwe

asa ɔde atɔ wúun pú ɔhá ání olobwií mu ansíbi mú á, anuméyín. Kókoli mli, mlfite mu onutó. Megyí kebi ógyi, aladan. Ɔbétalí lé mú ɔnɔ́.” 22 Mu akwúpú amu bude Yudafo ahande amu ifú nya. Mú su beblí alí ní. Tsúfɛ ahande amu bablí tswi beɛ, ɔhagyíɔha ání ɔbéblí ɔbéɛ, Yesu gyí *Kristo, (ɔhá ámú Bulu ladá mu ofúli amu) a, bégya mu lé Yudafo *ofiakpa unu. 23 Mú su mu akwúpú amu beɛ, “Megyí kebi ógyi, aladan, mlfite mu onutó!” ní.

24 Belatí oyin ámú bɔkwú mu ansibi obwiepú ámu otse nyɔɔsi, bláa mu beɛ, “Ka ntam Bulu ansítɔ ání féblí ɔnɔkwali. Anyin ání lakpan ɔbwepú oyin ámú olobwií fú ansíbi amu gyí.”

25 Mú oyin ámu léle mú ɔnɔ́ ɔbéɛ, “Ní lakpan ɔbwepú ogyi o, yilé ɔbwepú ogyi o, mí mú mmeyín. Toku kule pé nyin. Múgyí, tɛki bré ámu ntamawun atɔ́, táme séi mú ndewúun.”

26 Mú befuté mu beɛ, “Nkálí ɔlbwe fú? Nkálí olobwií fú ansíbi amu?”

27 Mú ɔlele mú ɔnɔ́ ɔbéɛ, “Nabláa mli dododo, táme mlumónu. Ntogyi sù ntráa bla mli? Mli é mlidékléá mlóbwe mu akasípú lóó?”

28 Besia mu, bláa mu beɛ, “Fúgyí mu ɔkasípú. Anu náin Mose akasípú aní mú anígyí. 29 Anyin ání Bulu lótoí bláa Mose asún, táme anuméyín ɔtínéá oyin ánfu mú otsú.”

30 Oyin ámu lébláa amú ɔbéɛ, “Ngya nto asún ní? Mluméyín ɔtínéá otsú, táme mulábwíí mí ansíbi ni o. 31 Aní fɛé anyin ání Bulu tamanú lakpan abwepú isu. Ɔhá ání otobú mú, otegyi mu mblasu isu otónú. 32 Tsú bréá Bulu lóbwe ɔyí ɔpá á, ɔhaa mɔkúnú ání ɔku labwíí ɔhá ání bɔkwú mu ansibi obwiepú ansíbi ki. 33 Ní megyí Bulu ɔha oyin ánfu gyí á, tɛki ɔméetalí bwé ɔtɔɔtɔ.”

34 Ahande amu bele mú ɔnɔ́ beɛ, “Fú ánfu fugyi lakpan ɔbwepú tsú bréá bɔkwú fú ánfu dékléá fósuná aní asún?” lnu nu begya mu lé ofiakpa unu.

Ɔhétɔ́ Ansíbi Bwie

35 Yesu lónu ání bagya oyin ámu lé ofiakpa unu. Mú su bréá olowun mu a, ɔlefuté mu ɔbéɛ, “Fɔho Nyankpusa-Mu-Bi ámu gyí?”

³⁶Oyin ámu lébláa mu ɔ́bée, “Owíé, suna mí ɔ́há ání ogyi, mí anho mu gyi!”

³⁷Yesu lébláa mu ɔ́bée, “Fawun mu dodo. Mугы́ ɔ́há ání ɔ́de fú asún bláa séi ání á.”

³⁸Múy oyin ámu lébláa mu ɔ́bée, “Mí Wíé, nahɔ fu gyi.” Inu olosúm Yesu.

³⁹Yesu léblí ɔ́bée, “Asún ogyíkpa neba ɔ́yí ánífɔ, ménu ahá ání bumedé ató wúun bówun ató. Ahá ání budewúun é ansíbi ibwie.”

⁴⁰Farisifɔ akvá bubu Yesu wá inu bonu asún ání. Múy befité mu beé, “Mú su fudeblí fee ani é angyí ansibi abwiep?”

⁴¹Yesu léle mú ɔ́nɔ́ ɔ́bée, “Ní ansibi abwiepú mligyí á, teki Bulu mééha mli ipón. Táme íniá mliaa mli dé ató wúun su á, mli lakpan lasin mli su.”

Akúfa ɔ́kparú Mva Mu Akúfa

10 ¹Yesu léblí ɔ́bée, “Ɔ́nɔ́kwali nde mli bláa. Ɔ́há ání ɔ́dú tsun akúfa ibansu wíé mútɔ́, ɔ́mɔ́tsun ɔ́kpa ɔ́nɔ́ á, owikplu pú ogyo otswapú ogyi. ²Tsúfé iban ɔ́nɔ́ akúfa ɔ́kparú tɔ́tsun wie mútɔ́. ³Iban ámvsu ɔ́kípu tefínkí mú há akúfa ɔ́kparú ámu tebíwíé. Ɔ́tɔ́pú akúfa amv dá tí amú, butonú mu ɔ́me, ɔ́tekpá amú dáli. ⁴Ní ɔ́kpá akúfa amv féé



Akúfa ɔ́kparú wankláán tɔ́pú akúfa amv dá tí amú, butonú mu ɔ́me, ɔ́tekpá amú dáli. (Yohane 10:3)

dáti a, otegya amú nkpa, butobuo mu, tsúfé buyin mu ɔme. ⁵Butamabuo ɔfɔ. Srí butesrí sí mu, tsúfé bumeyín mu ɔme.”

⁶Yesu léha amú yébi anfi, táme bumonu mú asu.

Akúfa Ɔkparú Wankláán Ámu

⁷Yesu létra bláa amú ɔbé, “Ɖnɔkwali nde mli bláa. Mígyí akúfa iban ámu ɔnɔ ní. ⁸Awikplu pú ogyo atswapú ahá ání begyankpá ba féé bugyi. Akúfa amu bumebi amú ɔme. ⁹Mígyí akúfa iban ámu ɔnɔ ní. Ní ɔku ɔtsun mitɔ wíé dáli a, tɔtɔ mɔɔbwe mú. Obéyénya atɔ gyí mwe. ¹⁰Owikplu agywun gyí, ɔbá bowi, ɔmɔ, oyinta atɔ. Mí mú neba, méni ahá bénya nkpa ání ulɔfon.

¹¹“Mígyí akúfa ɔkparú wankláán ámu ni. Akúfa ɔkparú wankláán totsúlá húli mu nkpa há mu akúfa. ¹²Táme akúfa ɔkparú ání ɔde ipa gyí, megyí mu onutó bú akúfa amu tesrí ní owun ɔkpataku ɔbá bekítá amú. Ɖkpataku ámu tekítá akúfa amutɔ ɔku, atráhe butedásáin. ¹³Oyin ámu tesrí, tsúfé ipa keke odegyí. Akúfa amu nkpa tamahían mu. ¹⁴Mígyí akúfa ɔkparú wankláán ámu ni. Nyin mí akúfa, mí akúfa é buyin mi, ¹⁵fé alá mí Sí ámu yin mi á, alí mí é nyin mu ni. Ntɔhúli mí nkpa há mí akúfa. ¹⁶Mbu akúfa bámbá aku é. Buma akúfa iban ánfutɔ. Ilehían ání nékpa amú é ba. Amú é bónu mí ɔme. Amú féé bɔbwe akúfa iku kule pú ɔkparú ɔkule.

¹⁷“Íni sú mí Sí tekle mi asún ní. Tsúfé natsúlá ání nɔhulú mí nkpa há ahá, méni nélanya mú. ¹⁸Ɖhaa méetalí swíí mí. Mí onutó latsúlá ání nɔhulú mú. Mbu ɔkpa húli mí nkpa, mbu ɔkpa lánýá mú é. Íni mí Sí lébláa mi ɔbéé mbwéé ní.”

¹⁹Mu asun blíhé anfi su Yudafo ahande amu bumetrá bwe kule. ²⁰Amútsó aku beblí bee, “*Ɖɔɔ laláhe bu mutɔ. Mu nwun ideyintá. Ɖhaa mátrá nu mu asun blíhé.”

²¹Aku é bee, “Ɖhá ání ɔɔ laláhe bu mutɔ méetalí blí asún ánfu odu. Ɖɔɔ laláhe ɔbétalí bwíí ansibi obwiepú ansíbi?”

Yesu Kiná

²²Ɖkeá butɔpókáin Bulu ɔtswékpa gyvrásu Yerusalem lɔfon. Alí bré ámu igyi lultɔ. ²³Yesu lóyɔ odeki Bulu

otswékpatɔ ɔtɪnekúá butetí unu “Salomo Abrándaású.”
 24Yudafɔ ahande amu aku befia bomlí mu. Befuté mu beɛ,
 “Ɖmenke kén asa fébláa anɪ ɔɔkwali amu? Ní fúgyí Kristo,
 (ɔhá amúú Bulu ladá mu ofúli amu) a, wuna le mú tii anɪ.”

25Yesu lébláa amú ɔbéɛ, “Nébláa mli bɔtsun, táme
 mlumédéhogyi. Ofúla amúú ndebwe mí Sí dátó ámu dé mí iwɪ
 adánsɛ gyí. 26Táme mlumédéhogyi, tsúfé mlu má mí akúfatɔ.
 27Mí akúfa butonú mí ɔmɛ. Nyin amú, butobuo mɪ. 28Ntehá
 amú nkpa ání itamatá. Bumóowu ekekeɛke. Ɖhaa méetalí swíí
 mí amú. 29Mí Sí amúú ɔɔpɔ amú há mí ámu dɔn tógyítɔ.
 Ɖhaa méetalí swíí amú lé mí Sí ibɔɔ. 30Mía mí Sí anigyí kule.”

31Unu á, Yudafɔ ahande amu betrá kulá abwi beɛ abutswɪ
 da Yesu mɔ. 32Táme Yesu léfité amú ɔbéɛ, “Nabwé ofúla
 tsɔtsɔɔtsá itsú mí Sí wá súná mli. Mútó mɔmu sú mlu dékléá
 mléda mí abwi?”

33Bebláa mu beɛ, “Megyí ofúla ání fabwé kukɔukɔ sú
 anɪaa abéda fú abwi. Alɪ amúú fablí abususu púkúsú líí
 Bulusu ámu sv. Nyankpusa fugyi, táme fɛɛ Bulu fúgyi.”

34Yesu léfité amú ɔbéɛ, “Bumɔwanlín wá mli Mbla
 ɔwulú ámuɔ beɛ, Bulu ɔbéɛ, ‘Mlgyí fé Bulu?’ 35Anɪyin ání
 ɔɔkwali Bulu asún igyi. Mú sv ní Bulu létɪ ahá amúú ɔɔpɔ
 mu asún há ámu ɔbéɛ, bugyi fé mu a, ntogyi sú mlu dé ɔbló
 nya? 36Mí mú á, mí Sí léle mí yáí, ngyi mu kle, ɔlɔwa mí sísí
 ɔyí ánfɔɔ. Ntogyi sú mlu déblí mlu aa nablí mbéɛ, ‘Bulu mu
 Bi ngyi’ sv nablí abususu púkúsú líí musu? 37Ní megyí mí
 Sí agyómá ndebwe mú á, mlu máhɔ mɪ gyi. 38Táme ní mí Sí
 agyómá ndebwe, asa mlu máhɔ mɪ gyi kúráá á, múmú mlu hɔ
 ofúla amúú ndebwe ámu mú gyi, amlɔbí ání Mí Sí ámu bu
 mɔɔ, mí é mbu mɔɔ.”

39Betrá bwe ání békutá mu, táme ɔledalɪ amú ibɪ, náttí sí
 amú.

40Yesu léyinkí fá Yordan ɔbún ba ɔtíné amúú Yohane
 létsiá bó ahá asú ámu, olesi tsiá unu. 41Ahá tsɔtsɔɔtsɔ beba
 mu wá, bude aba bláa beɛ, “Yohane móbwe osúna kukɔukɔ,
 táme asún ání Yohane léblí tsú oyin ánfɔ iwɪ féé laba mútó
 pépéépé.” 42Ahá tsɔtsɔɔtsɔ bɔhɔ mu gyi unu.

Lasaro Lowu

11 ¹Oyin ɔkúvá bɔtɛtí mu Lasaro mua mu apio tshé ^{*}Maria pú Marta betsiá Betania wúluto. Oyin ámu lóló. ²Maria anfi létsei mu ofobí fánfáánfán wólí aní Wíe Yesu ayabisu, pú mu imi tsítisi mú ni. Mu pio yínhé gyí Lasaro anfi ɔda ɔdebo á.^k ³Mú su mu apio tshé ánti bɔwa abí sísí Yesu bee, “Owíé, fú ɔdwepú débo.”

⁴Yesu lónu asún ámu a, ɔleblí ɔbéé, “Megyí ubo ánti ɔbómɔ mu, mboún ibéle Bulu numnyam ɔwan. lbówa mí Bulu mu Bi ánti é numnyam.”

⁵Yesu tekle Marta mua Maria pú Lasaro féé asún. ⁶Táme bréá olonu ání Lasaro débo á, ɔletrá si tsiá ɔtínéá ɔbu nkenyó kéké. ⁷Mú ɔma a, ɔlebláa mu akasípú ɔbéé, “Mliha ayinki yɔ Yudea.”

⁸Mu akasípú amu befuté mu bee, “Osunápú, nwén nfi Yudafɔ ahande bakle abuda fú abwi mɔ. Mú fee fétrá yinkí yó unu?”

⁹Yesu lópu yébi lé mú ɔnɔ ɔbéé, “Megyí ɔnɔhwírí dúanyɔ bu ekewóletɔ? Ní ɔha ná ɔyi keheto á, ɔtamasúti, tsúfé nsainto lówankí, su odewúun. ¹⁰Táme ní ɔku ná oklúnto á, otosúti, tsúfé ɔmedé ató wúun.” ¹¹Asún ánti ɔma a, ɔletrá blí ɔbéé, “Ani nyáwíe Lasaro ladídi, táme nɔyó anyetsinkí mu.”

¹²Akasípú amu bebláa mu bee, “Ani Wíe, ní ɔdedídi mú á, iwí bówa mu ɔnlɔn!”

¹³Lasaro lowu iwí asún Yesu déblí, táme akasípú amu mú buki bee mu didí keke iwí asún ɔdeblí. ¹⁴Unu Yesu lówunáa kpa mú opulu ɔbéé, “Lasaro lawú. ¹⁵Mli su ulawá mí ansigyí ání mma unu asa olowu, méni mlóho mi gyi. Mliha ayekí mu.”

¹⁶Unu Toma ání ogyi Tabí^l lébláa mu aba ámu ɔbéé, “Mliha ania munyɔ féé ayɔ, méni ní lowu ígyi kúráá á, ania munyɔ awu!”

^k 11:2 Íni kén bu 12:1-8to. ^l 11:16 *Didimus* múa *Toma* así gyí *Tabí* Griiki múa *Hebri* ɔblíto.

Dhá Ání Ɔtɔkúsúa Ahá Tsú Afúlito, Há Amú Nkpa

17 Yesu lówie Betania wúluto á, bebláa mu bee bopulá Lasaro ulagyi nkená. 18 Tsú Betania ya Yerusalem mɔfɔn máulu anyɔ. 19 Mú su Yudafɔ tsɔtsɔtsɔ beba *Maria mva Marta gyɔwi ɔhakpá, amú píó lowu su.

20 Benya bláa Marta ání Yesu ɔbá alɪ, ɔɔkɔsú yéfia mu ɔkpa. Maria mú lésin wóyítɔ. 21 Múú Marta lébláa Yesu ɔbéé, “Mí Wíé, tɛki ní fɔbu nfi á, tɛki mí píó mówu sí mí. 22 Táme séi kúráá nyin ání tógyítɔ́á fókulí Bulu á, ɔbéha fú.”

23 Yesu lébláa mu ɔbéé, “Fú píó ámu ɔbélakúsú.”

24 Marta lébláa mu ɔbéé, “Nyin ání ɔbókúsú eke tráhe amúú afúli bókúsú ámu.”

25 Yesu lébláa mu ɔbéé, “Mígyí ɔhá ání ntɔkúsúa ahá tsú afúlito, há amú nkpa. Ɔhá ání ɔɔhɔ mi gyi owú kúráá á, ɔbétrá tsiá nkpa. 26 Ɔhá ání otsie nkpa, ɔɔhɔ mi gyi é móowu ekekeeke. Faho músú gyi?”

27 Marta lótsulá músú ɔbéé, “Ee! Mí Wíé, nahogyi ání fúgyí Kristo, ɔhá ámúú Bulu ladá mu ofúli), Bulu mu Bi ámúú bee ɔbéba ɔyítɔ ámu ni.”

Yesu Lósú

28 Bréá Marta léblɪ alɪ tá á, oleyinkí ba wóyítɔ betɪ Maria ya utsétɔ́, bláa mu ɔbéé, “Osunápú laba, ɔde fú ti.” 29 Maria lénya nú mú alɪ, ɔɔkɔsú yó Yesu wá. 30 (Alɪ bré ámutɔ á, Yesu mókúnyá wíé wúluto. Ɔlí ɔtíné ámúú Marta lóyɔtu mu amu.) 31 Bréá ahá ámúú butsie Maria wá wóyítɔ, bude mu klun yíá ámu bowun ání alakúsú ɔtsáwule pé ɔyó á, bɔkúsú buo mu. Buki bee ɔyó opulákpá unu yósu.

32 Bréá Maria lówie Yesu wá á, ɔleda akpawunu, bláa Yesu ɔbéé, “Mí Wíé, ní fɔbu nfi á, tɛki mí píó mówu sí mí!”

33 Bréá Yesu lówun ání Maria mva ahá ámúú bubuo mu amu fée budesú a, ɪlehɪe han mu. Mú su mu ansí lepe. 34 Ɔlefíté amú ɔbéé, “Nkónó mlɪlópulá mu.”

Unu bebláa mu bee, “Anɪ Wíé, beki.”

35 ɩnu Yesu lósú. 36 Mú su Yudafo ámu beblí beɛ, “Kɩ alɩá ɔtehié dwé Lasaro!”

37 Táme amótó aku beblí beɛ, “Megyí oyin ánfɩ lóbwií ansibi obwiepú ámu ansíbi ni. Ntogyi sù ɔmetalí kítá Lasaro yáí, alawú?”

Lasaro Kusúa

38 Yesu ansí létrá pé, ɔlenatí yó opulákpá unu. Ibwi alato bopulá mu, bemináa ibwi tin mú ɔnó. 39 ɩnu ɔlebláa amú ɔbéɛ, “Mlumina ibwi ámu le ɔbó ámu ɔnó.”

Táme owupú ámu mu pio tsíhé Marta lébláa mu ɔbéɛ, “Mí Wíé, nde aná mú á, alayíntá. Nde eke náásí ɔpá bopulá mu.”

40 Yesu lébláa mu ɔbéɛ, “Mmebláa fu mbée ní fohogyi a, fówun alá Bulu ɩwɩ bu ifú?” 41 ɩnu bemináa ibwi ámu lé ɔbó ámu ɔnó. Yesu lótsu ansí fúá kɩ ɔsúsú, blí ɔbéɛ, “Mí Sí, nedá fú ɩpán ání fanú mí ɔme. 42 Nyin ání futonú mí mpái ekekegyíɛke. Táme ahá ánfɩ bulí nfi ánfɩ sù nablí alɩ, méni bóhogyi ání fúlówa mí.” 43 Bréá ɔɔɔɔ mpái ánfɩ tá á, ɔɔɔɔplón blí ɔbéɛ, “Lasaro, dalɩ ba!” 44 Lasaro lédalɩ a, tati kɩ mu ɩbɩ pú mu ayabi. Dúku é kɩ mu ansító. Yesu lébláa amú ɔbéɛ, “Mɩsankɩ mu ɔnatɩ.”

Bekikí Yesu Nwunsu

45 Yudafo amúú bobuo Maria ba unu ámu bowun tóá Yesu labwé. Mú su amú tsɔtsɔɔtsɔ ɔɔɔɔ mu gyi. 46 Táme amótó aku ɔɔɔɔ yébláa *Farisifo ámu tóá Yesu labwé. 47 ɩnunu Bulu *igyí ahapú dehen pú Farisifo ámu betɩ aba asún agyípú fia. Múú befuté aba beɛ, “Nkálɩ abóɔɔwe? Lélé mú á, oyin ánfɩ dé osúna tsɔtsɔɔtsɔ ɔwe. 48 Ní anuméka mu itin á, ɔhagyíɔha ɔɔɔɔ mu gyi. ɩbéha Romafɔ béba bobwie anɩ Bulu ɔswékpá amu, yíntá anɩ ɔmá!”

49 Táme amótó ɔkuleá butetí mu Kaiafa, ogyi Bulu igyí ɔhapú dehen ofí ámutɔ lébláa amú ɔbéɛ, “Mɩ mú mɩmýín ɔlala! 50 Mɩmókúbí ání ɩbu alá ɔbakúle obówu ahá féé nwunsu, dun ání ɔmá ámutɔ ahá féé béhɩ?” 51 Megyí Kaiafa onutó agywun ɔɔɔɔpublí asún ánfɩ. Táme ɩnɩá ofí



Yoh

Yesu lɔkplɔn blí ɔbée, “Lasaro, dali ba!” (Yohane 11:43)

ámɔɔ mɔgyí Bulu igyí ɔhapú dehen su á, igyi asún ání ɔleblí tswɔ ání ilehián ání Yesu obówu há Yudafɔ ɔmá.
⁵²Megyí bæe ɔmá ámu nkule pé su obówu, mboún alá

ɔbékpa Bulu ahá ání badásáín fée bɔwa abato, bóbwe ikule su.

⁵³Tsú eke ámu bɔwa agywun bwe ání bómo Yesu bi. ⁵⁴Ínu su Yesu métrá tsiá lé ɔwan Yudafɔto. Mboún ɔlenatí yó wúlu kuá butetí mú Efraim, ání ibu dimbísú. Mva mu akasípú amu betsiá inu.

⁵⁵Bré ámutɔ á, Yudafɔ nkeá bópugyi Israelfɔsu *Katsun Nke ámu lawíé wóyí tá. Ahá tsɔtsɔɔtsɔ bɔtsu awúlusu dú yó Yerusalem ání bɔyógyuráa ɔwa asa nke ámu ifun. ⁵⁶Bréá bɔyɔ Bulu ɔtswékpa wunsínésú inu á, bodunká ání bówun Yesu. Mú su befité aba bee, “Nkálí mlidékú? Mlulahogyi mluaa, ɔbéba nke ánfɔto lóó?” ⁵⁷Táme bré ámutɔ á, Bulu igyí ahapú dehen pú Farisifɔ ámu babláa ahá bee, ní ɔku owun ɔtínéá Yesu bu a, ɔhá amú ibu, méni beyékitá mu.

Ofobí Fánfáánfán Pwólí Yesu

(Mateo 26:6-13; Marko 14:3-9)

12 ¹Ilesi nkensíé abugyi Israelfɔsu Katsun Nke a, Yesu lóyɔ Lasaro amú ɔɔkɔsúba tsu afúlito ámu wúluto Betania. ²Mú ntúpwesu bɔtswi ɔpúnú há mu. Marta léye atogyihe ɔpúnú ámu asi. Lasaro mva ahá amúú beti ámu bɔwa ibu gyi ató Yesu wá. ³Inu *Maria lópu ofobí fánfáánfán ání ibu ibiá prentua yílé ɔbo betsei wólí Yesu ayabisu, ɔɔpu mu nwunsu-imi tsítsi mú. Ofobí ámu ɔfan loho wóyí ámutɔ fée.^m ⁴Táme Yuda Iskariot, ogyi Yesu akasípú amutɔ ɔkule, ɔbéle Yesu há ámu mú léblí ɔbéé, ⁵“Ofobí ánfɔ bu bíá. Ntogyi sú bumefe mú, pú kóba amu há ahiánfɔ? Mú bíá bóbwe ɔbakúle ofi ɔkule akatua.” ⁶Megyí ahiánfɔ nwewúun su Yuda dé asún ánfɔ blí. Owikplu ógyi su. Mu wá sika okentebi bu, otetsiá wí ku lé mútɔ.

⁷Yesu léblí ɔbéé, “Mlisi mu ɔpu ofobí ánfɔ wuli mí ha mí opuláké. ⁸Ahiánfɔ mú bétsiá mli wá ekekegyíeke, táme mí mú mméetsiá mli wá yó.”

^m 12:3 Oyi kuá butetí Naadi nlin butɔpúbwé ofobí ámu.

Bekiklú Lasaro Nwunso

⁹Yudafɔ tsɔtsɔɔtsɔ bonu ání Yesu laba Betania. Mú su begya ɔkpa yɔ mu ɔkíkpa. Megyí mu nkule su bɔyɔ mu. Beyéki Lasaro amú Yesu lɔkusúá tsu afúlito ámu é. ¹⁰Mú su Bulu *igyí ahapú dehen amu bɔbwe agywun bee bómu Lasaro é. ¹¹Tsúfé mu kusúá tsu afúlito su Yudafɔ tsɔtsɔɔtsɔ bude ɔma yinkí bɔho Yesu gyi.

Yoh

Bɔho Yesu Fé Owíe Yerusalem

(Mateo 21:1-11; Marko 11:1-11; Luka 19:28-40)

¹²Dyi kehe a, ɔɔm amú baba nke ogyíkpa amu bonu ání Yesu ɔbá Yerusalem. ¹³Mú su beka mbláa, bɔpu ɔkpa beyéfia mu. Bude okitikíti bee, “*Hosiána! Bulu oyúla ɔhá anfi ɔna aní Wíe Bulu dátɔ ɔbá anfi! Bulu oyúla Israel Owíe amu!”

¹⁴Yesu lénya afrímú ɔku, ɔɔɔɔ bian musu, fé alíá bɔwanlín wá Bulu asúntɔ bee,

¹⁵“*Sionfo, mlu mánya ifú!

Mli Wíe dín afrímú ibísú ɔbá á!”


¹⁶Yesu akasípú amu bumɔkɔsí nú asún anfi así. Táme bréá Bulu lɔkusúá Yesu tsú afúlito, wá mu numnyam ɔma a, bekaín aní bɔwanlín asún anfi tsú mu wɔ. Mú bɔbwe há mu a.

¹⁷Aha aní bobuo Yesu bréá ɔletɔ Lasaro fúli-ɔbɔtɔ, kúsúá mu tsú afúlito bɔyɔ músú dá asún anfi ɔkan. ¹⁸Ínu su ɔɔm amu beyéfia mu ni. Bonu ání alabwé osúna anfi. ¹⁹Farisifo amu bebláa aba bee, “Mlilawun aní anilabwé kásíán. Mlúki, ahá fee bayɔ bubuo mu o!”

Griikifo Aku Bodunká Yesu

²⁰Griikifo aku bubu ahá amú beba Bulu osúmkrpá Yerusalem Israelfɔsu Katsɔn Nke ámuɔ. ²¹Bɔyɔ Filipino aní otsu Betsaida aní ibu Galilea ɔmátɔ wá yébláa mu bee, “Owíe, anudékléá abówun Yesu.”

²²Filipo lébláa Andrea, mua munyɔ beyébláa Yesu. ²³Yesu lébláa amú ɔbé, “Bré lafun aní bówa Nyankpusa-Mu-Bi ámu



*Mú sv beka mbláa, bɔv ɔkpa beyéfia mv.
Bvde okitikíti bæe, “Hosiána” (Yohane 12:13)*

numnyam. ²⁴Ɖɔɔkwali nde mli bláa. Ní kpolibí mɔkúwíé ɔbótó, ikwe, pló á, kpoli ibi-kule amu kén igyi. Táme ní ikwe, pló á, utɔwé abí tsɔtsɔtsɔ. ²⁵Ní ɔku tɔdwé mu nkpa ɔyí ánfɔtɔ á, ɔbɔhulú mú. Ní ɔku é tamadwé mu nkpa á, obénya nkpa ání utamatá. ²⁶Ní mɔtɔ ɔku ɔbée mósum mí á, ilehián ání obóbuo mi, méní obétsiá ɔtínéá mbu. Ní ɔku dé mí sum á, mí Sí ɔbówa mu numnyam.”

Yesu Lowu Iwɪ Asún Blí

27 Yesu lóyɔ mósú ɔbéɛ, “Séi á, asún dé mí klun háan! Amansu néblí? Blí nteblí mbée, Mí Sí, le mí tsu asun wunhe anfito lóó? Ó-o, mú su neba ni. 28 Mí Sí, wa fú iwɪ numnyam!”

Iwu á, ɔme ɔku lótsu ɔsúsú ba ɔbéɛ, “Nawá mí iwɪ numnyam dodo. Nétrá wa mú.”

29 Bréá ɔɔm amú bulú unu ámu bonu ɔme amu a, beblí beɛ “Ɔpráda lapútí.” Aku é beɛ, “*Bulu-ɔɔɔɔ lábláa mu asún!”

30 Iwu Yesu lébláa amú ɔbéɛ, “Mli su ɔme anfi lalin, megyí mí. 31 Bréá Bulu obégyi ɔyítɔfɔ asún ní. Bréá Bulu ɔbékplí Ɔbunsám, ɔyísú ogyípú amu obiású ní. 32 Táme mí mú á, ní bedá mí mántá *oyikpalíhesu, tsú mú líí á, nékpa ahá féé ba mí iwɪ wá.” 33 (Yesu léblí asún ánti púsúná lowu oduá mówu.)

34 Iwu ɔɔm amu befité mu beɛ, “Ani mú anlónu tsú anu Mbla ɔwulú ámutɔ ání Kristo, (ɔhá amúú Bulu ladá mu ofúli amu) obétsiá bré féé. Mú ntogyi su fúdeblí fée, ilehián ání bedá Nyankpusa-Mu-Bi ámu mántá oyísú, tsú mú líí? Ma gyí Nyankpusa-Mu-Bi ámu?”

35 Yesu lébláa amú ɔbéɛ, “Bré kpalobí ku pé ulasí ání Wanki amu ɔbétrá tsiá mli wá. Íniá Wanki amu trá ɔbu mli wá á, mlunati wanki amutɔ, méni owí méeta wá mli. Tsufé ɔhá ání ɔna oklúntɔ tamabí ɔtunéá ɔyɔ. 36 Bré ánti wanki amu trá ɔbu mli wá á, mlhɔ mu gyi, méni mlóɔwe wanki amu abí.”

Yudafɔ Yesu Máhogyi

Bréá Yesu lébláa amú asun anfi tá á, ɔlenatí yéɔain. 37 Íniá ɔɔɔwe osúna tsɔtsɔtsɔ amú ansítɔ ó á, bumɔhɔ mu gyi. 38 Íni léha Bulu ɔnósú ɔtɔípú *Yesaia asún amúú ɔleblí tswi dodo amu léba mútɔ. Ɔbéɛ,

ⁿ 12:36 Yesu gyí Wanki amu.

“Ani Wíe, ma láhɔ asún ámúú anléblí ámúsu gyi?
Ma ani Wíe lalé mu túmi súná?”

³⁹Mú su bumetálí hɔ Yesu gyi, tsúfé Yesaia létrá blí ɔbéɛ,

⁴⁰“Ani Wíe Bulu lahá bumedéwúun,
búmedé asún nu,

Mú su bumóowun ató,
bumóonu asún, méni bédamlí ba mí wá,
nétsa amú ɔlɔ.”

⁴¹Yesaia lówun Yesu numnyam. Mó su ɔleblí asún ánfɔ tsú mu ɔwɔ ní.

⁴²Mú ó á, Yudafo ahande amu tsɔtsɔɔtsɔ ɔhɔ mu gyi, táme bumele amú hógyi ɔwan. Tsúfé benya ifú ání Farisifo ámu bébi amú, gya amú lé amú *ofiákpa. ⁴³Tsúfé butekle beɛ ahá bukánfu amú dun ání Bulu ɔbékanfú amú.

Yesu Asún Bulu ɔbɔpɔgyi Ahá Asún

⁴⁴Yesu lókplɔn blí ɔbéɛ, “Megyí mí nkule ɔhagyíɔha ání ɔlɔhɔ mi gyi déhógyi. ɔhá ámúú ɔlɔwa mí sísí ámu é. ⁴⁵ɔhagyíɔha ání ɔde mí wúun dé ɔhá ámúú ɔlɔwa mí sísí ámu é wúun. ⁴⁶Naba ɔyí ánfɔtɔ fé wankɔ, fékɔ ɔsulúv anfisɔ iwankɔ, méni ɔhagyíɔha ání ɔlɔhɔ mi gyi méesin oklúntɔ. ⁴⁷Ní ɔku onú mí asún, táme omegyí músú á, megyí mí ɔbéha mu ɔpón. Tsúfé mmeba asún ogyíkpá. Ahá nkpa ɔhókpa neba. ⁴⁸ɔha ání okíná mí, ɔmɔhɔ mí asún é bu asún ání ɔbɔpɔhá mu ɔpón. Mí asun blíhé amu ɔbéha mu ɔpón eke tráhe amu. ⁴⁹Tsúfé megyí mí onutó túmi ɔpɔtɔtɔ. Mí Sí lówa mí sísí. Muléha mí asún ání mblí, pú alíá mblí mú. ⁵⁰Nyin ání mu asún ámu ɔtehá nkpa ání ɔtamátá. Mó su asún ání ɔtɔwá mí blí kóún nteblí.”

Akasípú Amu Ayabiasɔ Fwɔ

13 ¹Asa béfi Israelfɔsu Katsun Nke ámu gyí asɔ á, Yesu lébi ání mu bré lafɔn ání médalɔ ɔyí ánfɔtɔ yó mu Sɔ wá. ɔlɔdwe ahá ámúú bugyi mu kle ɔsulúv nfi ámu alu yófɔn mu owuké.

²Mva mu akasípú amu befia ntópwe ató ogyíkpá. Alɔ bré ámutɔ á, ɔbunsám lawúna wie Simon Iskariot mu bi Yuda

klvnto ání oyéle Yesu ha. ³Yesu yin ání mu Si lópu tógyító wá mu ibuto. Oyin ání Bulu wá motsu ba, mu wá méyinkí yó ní. ⁴Mú su ọ́lele ibi ọ́lepe ámutọ́, ọ́lokusú wóí mu atadię tswi, tsú ọ́san sába. ⁵Ọ́letseí ntsu wá onuwetọ́, olefi asi ọ́de mu akasípú amu ayabiasí fwi. Ọ́fwí ọ́máýín a, alapú mu osiétọ́ ọ́san ámu tsítsi mu ayabiasí. ⁶Bréá ulọ́tu Simon Petro a, ọ́lefuté Yesu ọ́béę, “Mí Wíé, fú ọ́bófwi mí ayabiasí?”

⁷Yesu léle mú ọ́nó ọ́béę, “Fumóonu tó ánfí ndẹbwe ánfí asi séi. Ọ́ma asa fóbónu mú asi.”

⁸Mú Petro lébláa mu ọ́béę, “Ó-o! Mméesi, afufwi mí ayabiasí ekekekeke.”

Yesu lébláa mu ọ́béę, “Ní mmọ́fwi fú ayabiasí á, fuménya ogyíkpa mí wá.”

⁹Simon Petro lébláa mu ọ́béę, “Mí Wíé, megyí mí ayabi nkọ́le. Wuna fwi mí ibi pú mí nwuntọ́ é.”

¹⁰Yesu lébláa mu ọ́béę, “Ọ́há ání alabie ntsu métrá hián ntsubíe. Mboún mu ayabiasí fwi pé, tsúfé alalun dodo. Mli wu lalun, táme megyí mli féé.” ¹¹(Yesu lébláa mu alí, tsúfé oyin ọ́há ání ọ́béle mu há. Mú su ọ́leblí ọ́béę, “Megyí mli féé lálun” ni.)

¹²Bréá ọ́lọ́fwi amó ayabiasí tá á, ọ́lelatsú mu atadię wá, yínkí yétsiá ọ́púnú ámu asi. Mú ọ́lefuté amó ọ́béę, “Mlilanú utó ánfí nabwé há mli ánfí asi? ¹³Mlitetí mí ‘Osunápú,’ mlitetí mí ‘Owíé.’ Mú ọ́kpa ní, tsúfé mú ngyi ní. ¹⁴Ní mí ání ngyi mli osunápú pú mli Wíé, nafwí mli ayabiasí á, múmú ilehián ání mli é mlófwi mli aba ayabiasí. ¹⁵Nabwé súná mli, ménu mlóbwe mú alí ámúú nabwé mú há mli ámu. ¹⁶Ọ́nọ́kwali nde mli bláa. Osúmpú ọ́kuku móđvun mu wie. Alí kén sumbí ọ́yọ́pú móđvun ọ́há ání ọ́lọ́wa mu ni. ¹⁷Íniá mli labí ọ́nọ́kwali anfi á, Bulu obóyulá mli ní mlegyi músú.

¹⁸“Megyí mli féé wu asún ndeblí. Tsúfé nyin ahá ání nalé. Táme lehián ání Bulu asún ánfí ibéba mútọ́. Asún ámu ọ́béę, ‘Ọ́há ámúú mía munyo anidé ibi wa ọ́lepeto ámu lakúsú líí mísú.’ ¹⁹Nde mli bláa séi asa iba, ménu ní ibá á, mlóhọ́ mu gyi ání mígyí ọ́há ámúú mbéę ngyi ámu ni. ²⁰Ọ́nọ́kwali nde mli bláa. Ọ́hagyíọ́ha ání ọ́lọ́họ́ ọ́há ání ọ́lọ́wa sumbí laho mu.

Alí kén ɔhagyíɔha ání ɔlɔɔ mu laɔ mí Sí ámu ɔlɔwa mí sísí ámu é ní.”

Yesu Le Há

(Mateo 26:20-25; Marko 14:17-21; Luka 22:21-23)

²¹Bréá Yesu léblí asún ání tá á, asún ihíé de mu háan mu kluntɔ. Mú su olowunáa kpa mú tati ɔbéé, “Ɖɔɔkwali nde mli bláa, mliɔ ɔkule ɔbéle mí há.”

²²Akasípú amu bekpelé kí aba ansító, tsúfé bumeyín amútó ɔmúá ɔde. ²³Akasípú amutɔ ɔkuleá otsie mantáa Yesu, gyí ɔmúá Yesu tehié dwé ní. ²⁴Mú su Simon Petro lóɔbun mu ansíbi ɔbéé, ɔfíte mu ɔhá ání ɔbéle mu há.

²⁵Múú ɔkasípú amu léyinkí kpísá Yesusu, fíté mu ɔbéé, “Mí Wíé, ma ɔbéle fú há?”

²⁶Yesu lébláa mu ɔbéé, “Ɖhá á múú nébia bodobodo, púdá oputsútó há ámu gyí mu ní.” lnu olebia bodobodo púdá oputsútó há Yuda, ogyi Simon Iskariot mu bi. ²⁷Olenya hɔ mú alí, Ɖbunsám lówie mutɔ. Mú su Yesu lébláa mu ɔbéé, “Bwe tóá fudekléá fóbwe sasa!” ²⁸Ahá á múú butsie ɔpúnú ámu asi ámutɔ ɔkuku mébi tóá suá Yesu lébláa mu asún ání. ²⁹Amútó aku buki beé, Yuda gyí amú sikasu ɔkípu. Fíali Yesu dé mu bláa ɔbéé, ɔyíɔhɔ atóá bóɔɔgyi nke ámu, ntéé ɔpúú tɔku ya ahiánfo.

³⁰Yuda lénya hɔ bodobodo amu alí, ɔledali. Owí latá alí bré ámu.

Mbla Pɔɔpwe

³¹Yuda lénya dáli obuto unu alí Yesu léblí ɔbéé, “Bréá Mí, Nyankpusa-Mu-Bi ání numnyam bélin ɔwan ní. Bulu ɔbótɔsun misu lé mu numnyam ɔwan. ³²Ní ɔtsun misu lé mu numnyam ɔwan á, alí kén ɔbótɔsun mu iwísu lé mí numnyam ɔwan ní. Ɖbówa mí numnyam unu. ³³Mí abí, mméetrá tsiá mli wá, wá ɔpá. Mlódunká mí. Alí á múú nebláa Yudafo ahande amu mbée, ‘Mluméetalí ba ɔtínéá nɔyó ámu’ a, alí kén nde mli bláa mli é ní. ³⁴Mbla pɔɔpwe ndewa há mli mbée, mliɔwe aba. Alí á múú nɔɔdwe mli ámu a, alí kén mliɔpú

ɔdwe ámu dwe mli aba ní. ³⁵Ní mlidé aba dwe á, ibósuná ahá fée ání mí akasípú mligyí.”

Petro Ɖbóswí Ɖbé Mmeyín Yesu

(Mateo 26:31-35; Marko 14:27-31; Luka 22:31-34)

³⁶Simon Petro léfité Yesu ɔbé, “Mí Wíé, nkónu foyó?”

Yesu léle mú ɔnó ɔbé, “Ɖtíné ámú ɔyó ámu a, fuméetalí buo mi yó unu séi. Táme ɔma a, fóbobuo mi.”

³⁷Petro léfité mu ɔbé, “Mí Wíé, ntogyi sù mméetalí buo fu séi. Nówu fú su!”

³⁸Yesu léfité mu ɔbé, “Fówu mí su? Ɖnɔkwali nde fú bláa. Fóswí pú ibi wá ogyá tse sa fee fumeyín mí asa bate ɔbéle ɔnó.”

Ɖsí Ámu Wá Ɖkpa

14 ¹Yesu lébláa mu akasípú amu ɔbé, “Opúni mátsíí mli. Mliho Bulu gyi, amlího mi gyi. ²Otsiákpá tsɔtsɔtsɔ bu mí Sí wóyító. Ní otsiákpá ma unu á, teki mmebláa mli mbée neyéla unu yáí mli. ³Ní ɔyó yéla otsiákpá amu yáí mli tá á, néyinkí bá bekpa mli yáa mí unu wá, méni mlétsiá ɔtínéá mbu. ⁴Mliyin ɔkpa ání ida yo ɔtíné ámú ɔyó.”

⁵Unu Toma léfité mu ɔbé, “Mí Wíé, anumeyín ɔtínéá foyó, nkáli abóbwe abébi ɔkpa ámu?”

⁶Yesu léle mú ɔnó ɔbé, “Mígyí ɔkpa ámu, ɔnɔkwali amu pú nkpa ámu. Ɖhaa méetalí yó mí Sí ámu wá, nkéti alatsun musu. ⁷Ní mliyin mi lélé á, teki mlilabí mí Sí ámu é. Táme séi mú mlilawun mu, mlilabí mu é.”

⁸Filipo lébláa mu ɔbé, “Ani Wíé, suna anu fú Sí ámu. Mú kpán tsɔ anu.”

⁹Yesu léfité mu ɔbé, “Filipo! Mbu mli wá dodoodo. Mú su fumɔkóbí mí? Ɖhagyícha ání alawun mi ki lawun mí Sí ámu. Ntogyi sù fúdeblí fee, nsúna mli Ɖsí ámu? ¹⁰Fumohogyi ání mbu mí Sí ámutɔ, mu é ɔbu mutɔ? Asún ánti nde mli bláa ánti motsú mí onutó wá. Mboún mí Sí ámú ɔbu mutɔ ámu dé mu agyómá yo. ¹¹Ní nde mli bláa mbée, mbu mí Sí ámutɔ, mu é ɔbu mutɔ á, mliho mi gyi. Ní mlumócho asún

ámusu gyi óó á, ofúla amúú ndebwe ámu su mliho mi gyi. ¹²Ɔnɔkwali nde mli bláa. Ɖhagyícha ání ɔlɔho mi gyi a, ɔbɔbwe utá ndebwe. Ɖbɔbwe mú dun mí klé, tsúfé mí mú nɔyó mí Sí ámu wá. ¹³Nɔbwe tógyítá mlókúli mí idátó há mli, méni nɔwa mí Sí ámu numnyam. ¹⁴Ní mlókúli tógyító mí idátó á, nɔbwe mú.

Ɖɛ Wankíhé Amu Iba

¹⁵“Ní mlitɔdwé mí á, mlégyi mí mblasu. ¹⁶Nókúli mí Sí, ɔbɔpu Ɖma Ɖlúpú bambá sísí mli, ɔbéba betsiá mli wá bré féé. ¹⁷Muɔgyí Ɖɛ Wankíhé. Mutósúná ɔnɔkwali ání tɔbu Bulutɔ. Ɖyító ahá buméetalí ho mu, tsúfé bumédé mu dunká. Buméebi mu é, táme mli mú mlyin mu, tsúfé ɔbu mli wá, obétsiá mlitɔ.

¹⁸“Mméesi mli tswi fé awumbi. Néyinkí bá mli wá. ¹⁹Ulasí kpalobí ɔyító ahá bumétrá wun mi, táme mli mú mlówun mi. Ínɔ́á mbu nkpa su á, mli é mlétsiá nkpa. ²⁰Ní eke ámu ifun a, mlébi ání mbu mí Sí ámutɔ. Mli é mliɔbu mitɔ fé alí amúú mí é mbu mlitɔ ámu.

²¹“Ahá ání bude mí mblasu gyí a, amúgyí mí adwepú ní. Ɖhagyícha ání ɔtɔdwé mí á, mí Sí ɔbɔdwe mu. Mí é nɔdwe mu, lé mí tɔwɔ ɔwan súná mu.”

²²Múú Yuda (megyí Yuda Iskariot) léfuté mu ɔbéé, “Mí Wíe, ntogyi sù aní nkule pé féle tɔwɔ ɔwan súná, megyí ɔyító ahá féé?”

²³Yesu léle mú ɔnɔ ɔbéé, “Ní ɔku dé mí dwe á, ɔbɔbwe dínká mí atosunáhésu. Mí Sí ɔbɔdwe mu. Mía mí Sí ámu nɔ abéba betsiá mu wá. ²⁴Ɖhá ání ɔtamadwé mí ɔmɔɔbwe dínká mí atosunáhésu. Asún ánfɔ ndéblí mlidenu ánfɔ motsú mí onutó wá. Mí Sí lɔwa mí, mu wá itsú.

²⁵“Nde mli asún ánfɔ bláa, séi ánfɔ mbu mli wá. ²⁶Táme Ɖma Ɖlúpú, ogyi *Ɖɛ Wankíhé amúú mí Sí ɔbɔpusísí mí idátó ámu obósuná mli tógyító. Ɖbékaín mli asúngyíasún ání nebláa mli.

²⁷“Iwilwii nde mli ha! Napú mí iwilwii há mli. Megyí mú amúú ɔyítóɔ butehá ámu odu. Mlumáha opúni itsii mli.

Ifú é mákutá mli. ²⁸Nabláa mli bɔtsun mbée, ndenatí, táme néyinkí bá mli wá. Ní mliɔdwé mí á, teki mlénya ansigyí ání nɔyɔ mí Sí wá, tsúfé ɔdun mi. ²⁹Nde mli ínu fée bláa yaí, ménu ní íbá mútɔ á, mlóhogyi. ³⁰Mméetrá tɔí yɔ nkpa, tsúfé ɔyísú ogyípú ámu ɔbá. ɔma túmi mísú. ³¹Ntonú mí Sí ɔme, ménu ɔyítɔfɔ bébi ání ntɔdwé mu.

“Mlikusu anati.”

Wáun Oyí Onutó

15 ¹Yesu léblí ɔbée, “Mígyí *wáun ifla onutó. Mí Sí gyí mú ɔdɔpu. ²Bámbigyíbámbiá ibu mí iwí, itamaswíé á, ɔtekpálí mú tsítsá. Táme kugyíkúá itoswíé á, ɔtelá mú wankláán, ménu íbóswie tsɔtsɔtsɔ dun. ³Mí atosunáhé anfi mlɔlanú anfi su mli *iwí latun dodo. ⁴Mlitsia mítɔ, mí é antsia mliɔ. Bámbi kukukukú méetalí swíé abí, nkéti utsa mú oyísú brégyíbré. Alí kén mli é mli méetalí swíé abí, nkéti mli bu mitɔ ní.

⁵“Mígyí wáun ifla ámu. Mli gyí mú abámbi. ɔhá ání ɔbu mitɔ, mí é mbu mitɔ obóswie abí tsɔtsɔtsɔ, tsúfé mli méetalí bwé tɔtɔtɔ tsun mí ɔma. ⁶ɔhagyíɔha ání ometsie mitɔ gyí



Wáun ifla múa mú abi nu. (Yohane 15:5)

fé bámbiá bakpálí mú bun, íbówulí, békpa mú wá ogyá. ⁷Ní mltsie mutɔ, mí asún é íbu mlɔ á, mléfute mí Sí tógyítáá mlhdéklé, ɔbéha mli. ⁸Ní mloswíé abí tsɔtsɔtsɔ á, íbówa mí Sí numnyam. Mú obósuná ání mí akasípú mlgýí ní. ⁹Alí ámúb mí Sí tɔdwé mí ámu a, alí kén mí é ntɔdwé mli ní. Mltsia mítɔ, méní nódwe mli yó. ¹⁰Ní mlegyi mí mblasu á, nódwe mli yó, fé alí ámúb mí é ntegyi mí Sí mblasu, ɔɔdwé mí yó ámu.

¹¹“Nabláa mli asún ánfí fée, méní ansigyí ámúb íbu mlɔ ámu bétsiá mlɔ. Fówun ansí bégyi mli wankláán. ¹²Mbla ání ndepuhá mli gyí; mlidwe aba fé alíá ntɔdwé mli. ¹³Ɖwe kuku mɔdún ání ɔku obówu mu nyawie nwunsu. ¹⁴Ní mlegyi mí mblasu á, mí anyawíé mlgýí. ¹⁵Mmétrá tí mli mí asúmpú. Tsúfé osúmpú méyín tóá mu wie débwe. Nde mlɔ mí anyawíé, tsúfé nabláa mli tógyítáá nonu tsú mí Sí wá. ¹⁶Megyí mli léle mí. Mílélé mli yáí mbée, mliyɔ amltyoswie abíá íbétsiá bré fée, méní mí Sí ɔbéha mli tógyítáá mlɔkulí mu mí idátɔ. ¹⁷Mbla ání ndewa há mli gyí, ‘Mludwe aba.’

Ahá Bólu Mli

¹⁸“Ní ɔyítɔ ahá bude mli lu á, mlikaun ání mí begyankpá lú. ¹⁹Ní ɔyítɔ ahá mlgýí a, teki ɔyítɔ ahá bódwe mli fé amú abí. Táme nalé mli tsú ɔyítɔfɔtɔ, su mlumá amútɔ. Íni su ɔyítɔfɔ butolú mli ní. ²⁰Mlikaun asún ámúb nebláa mli mbée, ‘Osúmpú ɔkuku mɔdun mu wie’ amusu. Ní ahá budun mísú a, mli é bédinká mli su. Ní begyi mí asúnsú á, mli é bégyi mli asúnsú. ²¹Táme míbú mli, su bópu íni fée gyi mli, tsúfé bumeyín ɔhá ámúb ɔlɔwa mí ámu. ²²Ní mmɔkúbláa amú asvansu á, teki buma ipón kuku gyí. Táme séi ánfí mú buma ɔnɔ lé. ²³Ɖhagyíɔha ání otolú mí tolú mí Sí é. ²⁴Nabɔbwe agyúmá ání ɔhaa mɔkúbwé mú odu kí amútɔ. Ní bumɔpu amú ansíbi wun mú á, teki Bulu mééha amú ipón. Bowun tóá ɔbwe asa bude mía mí Sí lu. ²⁵Ilehián ání íbéba alí, méní asún ámúb ɔwanlín wá amú Mblatɔ beé, ‘Bolu mí kpaali’ ámu íbéba mútɔ.

²⁶“Nówa Ɖma Ɖlípú obótsu mí Sí wá bá. Mvgýí *Ɖhe Wankíhé amu. Mutósúná ɔnɔkwali ání íbu Bulutɔ. Obégyi mí

ɿwɿ adánsɿɛ. ²⁷Mli é mlégyi mí ɿwɿ adánsɿɛ, tsúfé mlulatsiá mí wá tsú bréá nefi ató suná asɿ.

16 ¹“Nabláa mli asún anfi fée, méni mluméedɿda hógyɿɿ. ²Yudafɿ ahande bégya mli lé amú ofiakpa. Bré ku kúráá ɿbéba ání ahá bómo mli, súsú beɛ Bulu agyómá budɛyɿ. ³Bópu ɿni gyi mli, tsúfé bumɿkúbí mí ntée mí Sí ámu. ⁴Táme nabláa mli asún ánti, méni ní ɿbá á, mlékaɿn ání nebláa mli yáɿ.

Yoh

Ɖɿe Wankíhé Gyumagyihɛ

“Mmɿkɿsɿ bláa mli asún ánti, tsúfé mbu mli wá. ⁵Táme séi nde mli bláa, tsúfé nɿyɿɿ ɿhá ámuɿ ɿɿɿwa mí sísí ámu wá. Táme mlɿɿ ɿkuku méfité mí ɿbéɛ, ‘Nkúnú fɿyɿɿ.’ ⁶ɿniá nabláa mli asún ánti su á, awɿrehɿ lahíé kítá mli. ⁷Táme nde mli ɿɿkwalɿ bláa. Ɖkláa lawá mli ogyá ání nɿyɿɿ. Tsúfé ní mmɿyɿɿ á, Ɖma Ɖɿɿpú amu ɿméeba mli wá. Táme ní nɿyɿɿ á, nɿpu mu sísí mli. ⁸Ní ɿbá á, ɿbéle súná ɿyɿɿɿ ahá ání lakpanbwe su bafwí, ɿbéle tóá igyi Bulu yilébwe pú mu asúngyí é súná amú. ⁹Bébu ání mísú máhógyi igyi lakpan. ¹⁰Bébu tóá igyi Bulu yilébwe, tsúfé nɿyɿɿ mí Sí wá, mluméetrá wun mɿ ekekeke. ¹¹Bébu tóá igyi Bulu asúngyí, tsúfé Bulu lahá ɿbunsám, ogyi ɿyɿɿsú ogyípú amu ɿpón dodo.

¹²“Mbu asún tsɿtsɿɿtsɿ ání nébláa mli, táme mluméetalí nú mú fée asɿ séi. ¹³Ɖɿe Wankíhé amu tósúná ɿɿkwalɿ ání ɿbu Bulutɿ. Ní ɿbá á, ɿbéle asún ání igyi ɿɿkwalɿ fée súná mli. Tsúfé megyí mu onutó túmitɿ ɿbótɿ, mboun ɿbéblí asún kugyíkúá olonu. Ɖbébláa mli múá ɿbéba é. ¹⁴Ɖɿé ámu ɿbówa mí numnyam, tsúfé ɿbébláa mli asún ání nteblí. ¹⁵Tógyɿtótá mí Sí búv a, mí bú. Mú su nabláa mli mbée, Ɖɿé ámu ɿbébláa mli asún ání nteblí ní.

Akasípú Amu Awɿrehɿ Pú Ansigyí

¹⁶“Ulasí kpalobí mluméetrá wun mɿ, táme ɿmóɿwa ɿpá kuku mlélawun mɿ.”

¹⁷Akasípú amutɿ aku befité aba beɛ, “Ngya ntɿ asún ní? Ɖbéɛ, Ulasí kpalobí, anuméetrá wun mu, táme ɿmóɿwa ɿpá

kuku, abélawun mu. Ɖdeblí é ɔbéé, ‘Nɔyó mí Sí wá?’ 18‘Ulasí kpalobí’ ánfí así mé? Anumédé asún ánfí ɔdeblí ánfí así nu.”

19Yesu lébɪ ání akasípó amu budekklé abufite mu asún ámuɔ. Mú su ɔlebláa amú ɔbéé, “Blí ndeblí mbée, ulasí kpalobí mlumétrá wun mi. Táme imóɔwa ɔpa kuku mlélawun mi. Ínu mlidé aba fité ní? 20Ɖɔɔkwali nde mli bláa. Mlósu kpisí, táme ɔyító ahá mú bénya ansigyí. Mlégyi awurehɔ, táme mli awurehɔgyí amu ibéba bemlí ansigyí. 21Ní ukwí de ɔtsi dwiín á, ahumiti tekítá mu, tsúfé mu iwɔsun wúunbɪ lafun. Táme onyákwíí tá pé ɔtetan mu iwɔsun ámuɔ, tsúfé ansí de mu gyí ání makwíí obí wá ɔyító. 22Alí kén igyi há mli ní. Ahumiti de mli séi, táme nélawun mli. Mú su mléhɛ nyá ansigyí ání ɔhaa méetalí ká mli itin.

23“Alí eke ámu a, mlumétrá kulí mí ɔɔɔɔɔ. Ɖɔɔkwali nde mli bláa. Tógyítóá mlókulí mí Sí mí idátó a, ɔbéha mli. 24Bɔɔɔ nde mlumókúfíté ɔɔɔɔɔ mí idátó. Mlufite, ɔbéha mli, méni ibéhɛ wá mli ansigyí.

Yesu Ɖyísú Gyí

25“Nde mli asún ánfí bláa ayébisu, táme bré ku béba, mmétrá ɔí ayébisu. Nówuná kpa mí Sí asún tati súná mli. 26Tsú bré ámuɔ púya a, mlókulí mí Sí ámu ató mí idátó. Mmedéblí mbée, mí ɔbókulí mu ató há mli. 27Tsúfé mí Sí ámu onutó ɔɔdwé mli. Ɖɔɔdwé mli, tsúfé mlitɔdwé mí, mlulahogyi ání notsú mu wá. 28Mí Sí wá notsu ba ɔyító. Séi á, ndeyinkí tsú ɔyító nɔyó mí Sí ámu wá.”

29Inu akasípó amu bebláa mu bee, “Ehéen! Séi mú á, futráa fumedéɔí ayébisu. 30Séi mú anlabí ání fuyin tógyító. Mú su mehián ání ɔhaa ɔbétrá fité fú asvansu. Ínu lahá anulahogyi ání lélé fotsú Bulu wá.”

31Yesu léfité amú ɔbéé, “Séi mú mlulahogyi? 32Bré ku íbá. Ulafun ta, mlédasáín. Mlito okugyíɔku ɔbóyɔ mu otsukpá sí mí. Táme iméesi mí nkule, tsúfé mí Sí ámu bu mí wá. 33Nabláa mli asún ánfí féé, méni mlótsun misu nyá iwilwii. Mlówun iwɔsun ɔyí ánfíɔ, táme mliwa klun, tsúfé nagyi ɔyísú dodo!”

Yesu Lóbo Mpái Mu Akasípó Nwunsu

17 ¹Yesu léblí asún ánfí tá, olotsu ansí fúá kí osúsú bó mpái òbée, “Óo mí Sí, bré lafvn. Wa mí numnyam, méni mí é nówa fú numnyam. ²Tsúfé feha mí túmi ahá féesú, ání nháa ahá ání feha mí fée nkpa ání itamatá. ³Nkpa ání itamatá ámu gyí, bubí fú Bulu Dnɔkwaliɔ ɔkukúnú ɔkule pé ánfí, abubu mí Yesu Kristo anfi fɔpusísi ɔyító ánfí. ⁴Nawá fú numnyam ɔsolúv anfisv, tsúfé namó agyómá ámu fɔpvhá mí ámu fée ɔnó. ⁵Mí Sí! Wa mí numnyam fú ansító ngya, fé alí ámu mbu mú fú wá yái asa fɔbwe ɔyí ámu.

Yoh

⁶“Nalé fú súná ahá ámu fele ɔyító há mí ámu. Fúbú amú, fɔpv amú há mí, bagyi fú asúnú. ⁷Séi babí ání tógyítá mbu itsú fú wá. ⁸Tsúfé nabláa amú asún ání fɔpvhá mí fée, banú. Babí ání lélé fú wá nótú, bahogyi ání fúlówa mí.

⁹“Nde fú kokóli ha amú. Megyí ɔyító ahá fée nde mpái bó há. Mboún ahá ámu fɔpvhá mí ámu, tsúfé fúbú amú. ¹⁰Mí klé igyi fú klé, fú klé é igyi mí klé. Fatsun amúsú lé mí numnyam ɔwan. ¹¹Nebá fú wá séi. Mméetrá tsiá ɔyító, táme amú mú bubu ɔyító. Mí Sí Wankíhé, pv fú idá ámu fɔpvhá mí ámu túmi kí amúsú, méni ɔbwe kule fé alí ámu mía funyo angyí kule amv. ¹²Bréá mbu amú wá á, nekutá amú wankláán, idá ámu fɔpvhá mí ámu túmito. Nele ansí kítá amú wankláán. Mmeha amútó ɔkuku mófwi, dun ɔmvamú idá yái ání ɔbéhu ámu, féki Bulu asun wanlínhé amv íbéba mútú. ¹³Nebá fú wá séi. Táme bré ánfí ntráa mbu ɔyító nfi nde asún ánfí blí, méni bénya ansigyí fé alí ámu mí é mbu ansigyító amv. ¹⁴Nabláa amú asún ámu febláa mí ámu. Mú sv ɔyító ahá bude amú lu, tsúfé butráa bumegyí ɔyító, fé alí ámu mí é mmegyí ɔyítóyín amv. ¹⁵Mmedéblí mbée, fulée amú le ɔyító. Mboún mbée fukú amúsú wankláán, méni bumóowie lalaha ɔbwepó amú íbito. ¹⁶Alí ámu mmegyí ɔyítóyín ngyi ámu a, alí amú é bumegyí ɔyító ní. ¹⁷Fú asún ámu gyí ɔnɔkwali. Tsun músú afupu amú bwe fú klé. ¹⁸Alí ámu fowa mí sísi ɔyító amú a, alí

◦ 17:15 Ɔbunsám gyí lalaha ɔbwepó.

mí é nawá amú sísí ní. ¹⁹Amú su nɔpu iwɪ há fú, méni amú é bótson ɔɔkwali amusu mlí fú klé.

²⁰“Megyí mí akasípú amu nkule nde mpáí bɔ há. Mboún ahá ání bótson amú atosunáhésu ho mi gyi fée ndeɔ há. ²¹Nde mpáí bɔ mbée, amú fée bubwée kule. Mí Sí, ali ámú fubu mitɔ, mí é mbu futɔ ámu a, ha amú é abutsia antɔ ali kén, fówun ɔyítɔ ahá bóhogyi ání fúlówa mí sísí ɔyítɔ. ²²Nawá ahá ání numnyam amú fowa mí ámu, méni bóbwe kule fé aliá ntsu tamatsun miá funyɔ nsuné. ²³Mbu amú fú fé aliá fubu mitɔ, méni bóbwe kule, ntsu mɔɔtsun amú nsuné. Ní íbá ali á, ɔyítɔ ahá bébi ání fúlówa mí, futɔdwé amú fé ali ámú futɔdwé mí ámu.

²⁴“Mí Sí! Ndeklé mbée ahá ámú fɔpuhá mí ámu bétsiá mí wá ɔtíne ámú mbu amu. Fówun bówun numnyam amú fowa mí ámu. Tsúfé futɔdwé mí asa fɔbwe ɔyí. ²⁵Mí Sí Yilé ɔbwepú! ɔyítɔfɔ bumebi fú, táme mí mu nyin fu. Ahá ání é buyin ání fúlówa mí sísí ɔyítɔ. ²⁶Nele fú súná amú. Nétrá le fú súná amú. Fówun ɔdwe ámú futɔdwé mí ámu itsia amú fú, méni mí é nétsiá amú fú.”

Yesu Kitá

(Mateo 26:47-56; Marko 14:43-50; Luka 22:47-53)

18 ¹Yesu lóɔ mpáí ání tá á, mua mu akasípú amu benatí yótson Kidron tsonkolitɔ wíé ndobíi kuto. ²Yuda amú ɔlele Yesu há ámu é yin ndobíi amuto, tsúfé Yesu mua mu akasípú butetsiá yéfia unu. ³Mú su Yuda lékpa Romafɔ ísá akɔpú pú Bulu ɔtswékpa agyópu akvá Bulu *igyí ahapú dehen pú Farisifɔ bɔwa, bɔyɔ unu. Bude mbia, nkandíe pú akɔtɔ. ⁴Íniá Yesu yin tɔá íbá musu su á, ɔledali fia amú, fíté amú ɔbé, “Ma mlidédunká?”

⁵Bele mú ɔnɔ bée, “Yesu Nasaretyin amu.”

Yesu lébláa amú ɔbé, “Mí ní.”

(Yuda amú ɔde mu le há ámu é líí amú wá unu.) ⁶Bréá Yesu lébláa amú ɔbé, “Mí ní!” á, besankí yéduda lalá kpla.

⁷Yesu lélafíté amú ɔbé, “Mbée, ma mlidédunká?”

Bebláa mu bée, “Yesu Nasaretyin amu.”

⁸Yesu lébláa amú ɔ́bée, “Nakú bláa mli mbée, mí ní. Mú su ní mí mlidédunká mú á, mliha ahá ánfí abunati.” ⁹(Ɔlebláa amú ali, méni asún á mú ɔ́leblí ámu íbéba mútɔ́. Ɔ́bée, “Ahá á mú ɔ́pohá mí ámu ɔ́kuku múfwí.”)

¹⁰ɪnu á, Simon Petro dé ɔ́dayí ɪya anyɔ́, ɔ́lebití mú lé, kpá Bulu igyí ɔ́hapú dehen osúmpú gyɔ́ɪ ɪsu. Osúmpú amu ɪdá gyí Malkus. ¹¹Yesu lébláa Petro ɔ́bée, “Sankia fú ɔ́dayí wa mú ɔ́fletɔ́! Imehián ání nówun ɪwɪɔ́sun ání mí Sí lahá mí ɔ́bée nwúun lóó?”

Yesu Kpa Ya Hana

(Mateo 26:57-58; Marko 14:53-54; Luka 22:54)

¹²ɪnu ɪsá akɔ́pú ámu, amú ɔ́hande pú Bulu ɔ́tswékpá agyópu amu bekítá Yesu, klí mu ɪbi. ¹³Begyankpá kpá mu ya Kaiafa mu sia Hana. Kaiafa gyí Bulu igyí ɔ́hapú dehen ofí ámu ɔ́ ní. ¹⁴Mulébláa Yudafo ahande amu ɔ́bée, ɪbu aláá ɔ́bakúle obówu ahá féé nwunsv ní.

Petro Lékiná Yesu

(Mateo 26:69-70; Marko 14:66-68; Luka 22:55-57)

¹⁵Simon Petro mva ɔ́kasípú bambá bobuo Yesu. Bulu igyí ɔ́hapú dehen amu yin ɔ́kasípú bámbá ánfí wankláán. Mú su olobuo Yesu bitíwíé Bulu igyí ɔ́hapú dehen amu wóyítɔ́. ¹⁶Táme Petro mú lési ɔ́lú wóyí ámu ɔ́nɔ́. Ɔ́kasípú bámbá ánfí óyin Bulu igyí ɔ́hapú dehen anfi lédalɪ yébláa otsibi ɔ́kúá ɔ́de wóyí ámu ɔ́nɔ́ gyɔ́, ɔ́lekpa Petro ba wóyí ámu ɔ́. ¹⁷Otsibi amu léfité Petro ɔ́bée, “Megyí oyin ámu akasípú amu ɔ́ku fúgyi?”

Petro léle mú ɔ́nɔ́ ɔ́bée, “Èkekεεεε. Mma amútɔ́.”

¹⁸Atsalɪ bu ɪnu. Mú su asúmpú pú agyópu amu bɔ́dɔ́dá ogyá, bulí mú asi. Petro é léyelí amú wá, ɔ́de ogyá ámu núu.

Bulu Igyí Ɔ́hapú Dehen Léfité Yesu Asún

(Mateo 26:59-66; Marko 14:55-64; Luka 22:66-71)

¹⁹Bulu igyí ɔ́hapú dehen amu léfité Yesu asún, tsú mu akasípú pú mú atosunáhé ɪwi. ²⁰Yesu léle mú ɔ́nɔ́ ɔ́bée, “Ahá

ansító nelí blí mí asún fée. Netsiá súná ató Yudafo *ofiakpa pú *Bulu ɔtswékpa, ɔtínéá ahá fée butefia. Mmèblí asvansu ñainto. ²¹Ntogyi só fúde mí asún ánfí futé. Fite ahá ání bonu asún ání neblí. Amú yín asún ání neblí.”

²²Bréá Yesu léblí asún ánfí á, unu agyópu amuto ɔkuleá ɔlú mantáa mu léda mu usuto, fíté mu ɔbéé, “Alí féle Bulu igyí ɔhapú dehen asún ɔnó ní?”

²³Yesu lébláa mu ɔbéé, “Ní nablí asvulkan á, le mú blí ɔhagyíɔha onu. Táme ní ɔnɔkwali nablí á, ntogyi su fúde mí da?”

²⁴Yesu trá ɔda ɔfétó ɔhande Hana lópu mu sísí Bulu igyí ɔhapú dehen Kaiifa.

Petro Létrá Kiná Yesu

(Mateo 26:71-75; Marko 14:69-72; Luka 22:58-62)

²⁵Simon Petro trá ɔlú ogyá ámu asi, ɔku léfité mu ɔbéé, “Megyí oyin ánfí akasípú amuto ɔkule fuygi?”

Petro lóswú ɔbéé, “Èkekèkè. Mma amótó!”

²⁶Bulu igyí ɔhapú dehen amu osúmpú ɔku, ogyi ɔhá ámú Petro lékpa mu usv kule amu mu pio léfité Petro ɔbéé, “Megyí fúa munyo nowun ndobii amuto ní?”

²⁷Petro létrá swí pú ibi wá ogyá. Inunu bate lóbon.


Yesu Kpa Ya Pilato

(Mateo 27:1-2, 11-14; Marko 15:1-5; Luka 23:1-5)

²⁸Ɔyi kehe bake-bake a, bekpa Yesu tsú Kaiifa wóyító ya Roma ɔhande ání ɔde Yudea ɔmású gyí wóyító. Yudafo ahande amu bumedékléá bópu ifin da iwí. Mú su bumbétiwíé wóyító unu. Tsúfé budekléá béki ání amú *iwí letun, méni bétalí gyi Israelfosu Katsun Nke ámu.^p ²⁹Mú alí su Pilato lédalí ba kpankpá befíté amú ɔbéé, “Amansu mlibu blí tsú oyin ánfí iwí?”

³⁰Bébláa mu beé, “Ní ɔhá ánfí mókúbwé lakpan á, tekú anumékpa mu ba fu.”

^p 18:28 Ní fowíé ɔhá ání omegyí Yudayin wóyító a, ifin lada fu.



Yoh

Yesu kpa ya Pilato ni. (Yohane 18:28)

31 Pilato lébláa amú ɔ́bée, “Múmú mlikpa mu ya, amlyegyí mu asún mli mbla ɔ́nó.”

Yudafo ahande amu bele mú ɔ́nó bee, “Animá ɔ́kpa mɔ́ ɔ́ha.” 32 (Asún ánfí léba mútɔ́, méni asún ámúú Yesu léblí tsú mu lowu ání obówu twí ámu íbéba mútɔ́.)

33 Inu Pilato léyinkí wíé wóyítɔ́. Múú ɔ́letí Yesu, fíté mu ɔ́bée, “Fúgyí Yudafo owíé amu ni?”

34 Yesu léle mú ɔ́nó ɔ́bée, “Fú onutó asun fitéhé igyi, ntée aku lábláa fu mí twí asún?”

35 Pilato léle mú ɔ́nó ɔ́bée, “Yudayin ngyi? Fú onutó ahá pú Bulu igyi ahapú dehen lékpa fú ba mi. Ntɔ́ fabwé?”

36 Yesu lébláa mu ɔ́bée, “Megyi ɔ́yí ánfítɔ́ nde iwíé gyí. Ní ɔ́yí ánfítɔ́ á, teki mí abúopu bóko ho mi. Buméeha bumóɔpu mí wá Yudafo ahande íbúɔ́, táme megyi ɔ́yí ánfítɔ́ nde iwíé gyí!”

³⁷Pilato léfuté mu ɔbéé, “Múmú yéé owíe fugyi á?”

Yesu lélé mú ɔnɔ ɔbéé, “Ɖnɔkwali fablí fée Owíe ngyi. Mí á, bɔkwí mí neba ɔyí ánfuto ání mbá ambegyí ɔnɔkwali amu iwí adánsíe. Ɖhagyícha ání ogyi Ɖnɔkwali amu klé teyaa asu nú mí ɔme.”

³⁸Pilato léfuté mu ɔbéé, “Nto gyí ɔnɔkwali amu?”

Pilato Léha Ɖkpa Ɖbéé Bwmɔ́ Yesu

(Mateo 27:15-31; Marko 15:6-20; Luka 23:13-25)

Pilato léblí asún ánfu tá á, ɔletrá dali ɔ́ Yudafɔ́ ámu wá wóyí ɔnɔ unu. Ɖlebláa amú ɔbéé, “Mmɔkúwun lalahe kukubukvá nɔ́puhá oyin ánfu ipón. ³⁹Táme mli amándíé ɔnɔ á, ntesí obu ɔdipú ɔkule há mli Katsun Nke kugyíkuto. Mludéklé mlíaa, nsíi Yudafɔ́ Owíe anfu ha mli?”

⁴⁰Bɔkplón le mú ɔnɔ beé, “Èkekeke! Megyí mu. Si Baraba ha aní.” (Ogyo otswapú Baraba é gyí).

19 ¹Unu Pilato léha bekpá Yesu ya, yéputí mu ató wankláán. ²Isá akɔpú ámu bɔlu obungyo-awu, bwé mú owíepa bun mu nwun, bɔwa mu ligá pepe ku. ³Unu benatí bwé mu ahinlá beé, “Yudafɔ́ Owíe, fú nkpasu ɔnlunsu!” Fówun badá mu tsuto kpa.

⁴Pilato létrá dali ɔ́ wóyí ɔnɔ unu yébláa amú ɔbéé, “Nakpá mu neba mli, amlíwun ání mmɔkúwun lalahe kuku mu iwí.” ⁵Bréá Yesu lédali ba a, obungyo-awu ipa ámu bun mu nwun, ɔ́wa ligá pepe amu. Pilato lébláa amú ɔbéé, “Mu ni!”

⁶Bulu igyí ahapú dehen pú Bulu ɔtswékpa agyópu amu benya wun mu pé, bɔsurá okitikítí blí beé, “Da mu manta oyikpalíhesu! Da mu manta oyikpalíhesu!”

Pilato lébláa amú ɔbéé, “Mli onutó mlíkpa mu ya, amlíyeda mu manta oyikpalíhesu. Mí mú mmɔkúwun lalahe kuku mu iwíá nɔ́puhá mu ipón.”

⁷Yudafɔ́ ámu bebláa mu beé, “Ani mbla ɔnɔ á, ilehián ání obówu. Tsúfé ɔleblí ɔbéé, Bulu mu Bi mugyi.”

⁸Bréá Pilato lónu asún ánfu á, ifú létrá kutá mu tsíá mútɔ́.

⁹Oleyinkí yó mu wóyítɔ́ yéfité Yesu ɔbéé, “Nkúnú fotsú?”

Táme Yesu mékpla mu. ¹⁰Mú su Pilato léfuté mu ɔbéé, “Fuméekplá mí? Fumeyín ání mbu túmiá nétalí sí fú ntée nétalí há beda fú mántá oyikpalíhesu mós fú?”

¹¹Yesu léle mú ɔnɔ ɔbéé, “Ní megyí Bulu léha fú ɔkpa á, teki fuma túmi kuku mísú. Ínu su ɔhá ámúú ɔɔpɔ mí wá fú ɔbɔ ámu lakpan dɔn fú klé.”

¹²Pilato lónu asún ánfɔ á, olekle osi Yesu. Táme Yudafo ámu bɔsɔrá okitikíti kúklúkúú blí beɛ, “Ní fesi ɔhá ánfɔ á, múmú megyí Roma owíe dehen^q mu nyawie fugyi. Tsúfé ɔhagyíɔha ání ɔblí ɔbéé owíe mugyi á, alakúsú líí Roma owíe dehensu!”

¹³Bréá Pilato lónu asún ánfɔ á, ɔlekpa Yesu dáli ba krankpá, tsíá mu asúngyi obíá ání itsie ɔtɔnekvá bɔpɔ abwi bwé unu, butetí unu “Abwɔtɔ” su. (Butetí unu “Gabata” *Hebri ɔblítɔ.) ¹⁴Eke ámu igyi *ogyá ɔdudáké há Israelfɔsu Katsun Nke. ɔbɔwe fé ɔpa dódúanyɔtɔ á, Pilato lébláa Yudafo ámu ɔbéé, “Mli Owíe amu ni!”

¹⁵Bɔsɔrá okitikíti beɛ, “Kpa mu ya, kpa mu ya, afuyeda mu manta oyikpalíhesu.”

Pilato léfuté amú ɔbéé, “Ndáa mli owíe manta oyikpalíhesu?”

Bulu igyi ahapú dehen amu bebláa mu beɛ, “Anumá owíe ɔkuku dɔn Roma owíe dehen!”

¹⁶Ínu Pilato lési Yesu há amú ɔbéé buyéda mu manta oyikpalíhesu.

Yesu Da Mántá Oyikpalíhesu

(Mateo 27:32-44; Marko 15:21-32; Luka 23:26-43)

Ísá akɔpú ámu bekpa Yesu náti. ¹⁷Mu onutó olotsu mu oyikpalíhe dínká mu nkanta alu yéwie ɔtɔnekvá butetí unu “Nwun Okokobi Otsiákpá.” (Butetí unu “Golgota” Hebri ɔblítɔ.) ¹⁸Beda Yesu mántá oyikpalíhesu unu, beda ayin abanyó aku é mántá nyikpalíhesu mu wá unu. ɔkule bu Yesu binasu, ɔkule é bu mu gyɔpɔsu, Yesu bu amú nsúné. ¹⁹Pilato

^q 19:12 Roma Owíe dehen gyí Kaesare.

lówanlín asún mántá oyikpalíhe amu awunso. Asún ámu gyí, “YESU NASARETYIN, YUDAFƆ OWÍE.” ²⁰Yudafɔ tsɔtsɔtsɔ bekla asun wanlínhé anfi. Tsúfé ɔtíné á múú beda Yesu mántá oyikpalíhesu ámu ibu mantáa Yerusalem. Ɖleha bɔwanlín asún ámu *Hebri ɔblí, Roma ɔblí pú Griiki ɔblítɔ. ²¹Bulu igyí ahapú dehen amu bebláa Pilato bee, “Máwanlín fee, ‘Yudafɔ Owíe.’ Mboún wanlun fee, ‘Oyin á nfi ɔbé, mígyí Yudafɔ Owíe.’”

²²Pilato lébláa amú ɔbé, “Múá nawánlín á, nawánlín mú dodo.”

²³Isá akɔpú ámu beda Yesu mántá oyikpalíhe amusu tá á, botsu mu atadie, beye mútɔ aku ana. Okugyíɔku klé kule. Botsu mu ligá á ní bɔlu mú tsú ɔsúsú beyi asi. ²⁴lɔu bebláa aba bee, “Mlumáha abali atadie á nfi mútɔ. Mlɔha atswi abi kɪ bee, ma obénya mú.” Asún á nfi léba, méni Bulu asún á múú bɔwanlín tswi bee,

“Beye mí atadietɔ,

bɔtswi abi mí ligású” amu ɔléba mútɔ.

Isá akɔpú ámu bɔbwe dínká músú.

²⁵Yesu mu yin, mu yin mu pio tsíhé *Maria, ogyi Klopa mu ka pú Magdalayintse Maria bulí oyikpalíhe amu asi. ²⁶Bréá Yesu lówun mu yin pú mu ɔkasípú á múú ɔtehié dwé ámu, bulí mantáa unu á, ɔlebláa mu yin ɔbé, “Amó yín, fú bí ní.”

²⁷Múú ɔlebláa ɔkasípú amu é ɔbé, “Fú yín ní.” Tsú eke ámu a, ɔkasípú amu lékpa mu ya mu wóyítɔ.

Yesu Lowu

(Mateo 27:45-56; Marko 15:33-41; Luka 23:44-49)

²⁸Ínu ɔma a, Yesu lówun á ní mu agyómá lamɔ ɔnɔ. Múú ɔleblí ɔbé, “Ɖmewúlɔ de mí.” Ínu leha Bulu asún á múú bɔwanlín tswi amu ɔleba mútɔ.

²⁹Onuwé ku tsie unu, ntá ɔdái ɔbɔ mú. Isá akɔpú ámu bɔpu ɔsɔpɔ dá ntá ámutɔ púsíán oyísú, tsú mú fúá yétin mu ɔnɔ. ³⁰Yesu lékpɔkpɔ mú mé. lɔu ɔleblí ɔbé, “Ulatá!”

Múú oloko nwuntɔ wá, ɔlele ɔhe á.

Yesu Abuntɔ Atɔ Wɔ

31 Eke ámu igyi Fieda. Mú ɔyi kehe igyi ɔkpónú ɔdaké kponkponu há Yudafɔ. Mú su bumekle ání ahá ámu busían nyikpalíhe amusu yɔfun owi tahé.^r Mú su bɔkulí Pilato ɔkpa beɛ ɔháa mu usá akɔpú abuyebiabía amú ayabi, méni bɔkɔsí wú, fówun béle amú tsu nyikpalíhe amusu asa owí ɔta. 32 Mú su bɔyɔ yébiabía ayin abanyó ámu ayabi. 33 Táme bréá bowie Yesu wá á, bowun ání alawú dodo. Mú su bumebia mu ayabi. 34 Táme usá akɔpú ámutɔ ɔkule lópu mu pía wɔ Yesu abuntɔ, ntsu múa obugya lefen dali. 35 (ɔhá ámú olowun mú ámu légyi mú iwɔ adánsɛ, fówun mli é mlóhogyi. Megyí afunu igyi. Oyin ání ɔnɔkwali asún mudéblí.) 36 Íni féé léba mútɔ, méni Bulu asún ámú bɔwanlín tswi beɛ, “Buméebia mu iwú kukukuku” ámu íbéba mútɔ. 37 Bulu asun wanlínhé amu kén leblí ɔbéɛ, “Béki ɔhá ámú bɔwɔ mu abuntɔ pía ámu.”

Yoh

Yesu Pulá

(Mateo 27:57-61; Marko 15:42-47; Luka 23:50-56)

38 Íni féé ɔma a, Arimateayin *Yosef léba bokokóli Pilato ɔbéɛ, ɔpú Yesu fúli amu ha mu. (*Yosef anfi buo Yesu ɔáintɔ, tsúfé ɔde Yudafɔ ahandɛ amu ifú nya.) Pilato léha mu ɔkpa. Mú su Yosef léyɛɛ Yesu fúli amu oyópulá. 39 Nikodemo amú ɔleba Yesu wá eke ɔku onyé ámu é léba. ɔɔpu afá fánfáanfán aku anyɔ^s ání bɔkwe mú wá abato tsɔtsɔtsɔ ba. Mú odwin bɔbwe kílo advasa (30). 40 Ayin anfi bɔpú ɔhráda kíklí afá ámu mántá fúli amu iwɔ fé alhá Yudafɔ butɔbwé amú afúli asa butopúlá amú. 41 Ndobíi ku íbu mantáa ɔtíné ámú beda Yesu mántá oyikpalíhesu ámu. Bolotí butátɔ bwé mú fúli-ɔbɔ unu. Bumɔkúpulá ɔhaa mútɔ kí. 42 Íniá eke ámu igyi *ogyá ɔdudáké, fúli ɔbɔ ámu é íbu mantáa unu su á, bopulá Yesu mútɔ.

^r 19:31 Yudafɔ ɔkpónú ɔdaké tefi asu tsú owi tahé. ^s 19:39 Afá aku anyɔ ámu adá gyí *mire* múa *aloe*.

Yesu Kusú Tsú Afúlitso

(Mateo 28:1-8; Marko 16:1-8; Luka 24:1-12)

20 ¹Ndawótswítso eke gyankpapo, igyi Kwasiada bake-bake, bréá nsaunto mókútítu a, Magdalayintse Maria lóyo Yesu opulákpá unu. Olenya wíe unu alí olowun ání bamína íbwi ámu lé ɔ́bɔ́ ámu ɔ́nɔ́. ²Mú su oleyinkí srí ba ɔ́kasípú ámúú Yesu tshíé dwé mu amu mua Simon Petro wá, bebláa amú ɔ́béé, “Balé Yesu ɔ́bɔ́ ámutso. Anímeyín ɔ́tínéá bapú mu yówa!”

³Múú Petro mua munyɔ́ bɔ́pu ɔ́kpa bɔ́yɔ́ opulákpá unu. ⁴Amú abanyɔ́ ámu féé betsíí ɔ́srí, táme ɔ́lesrí sí Petro gyankpá yówie opulákpá unu. ⁵Bréá olobun kí ntsán ámutso á, olowun ání ɔ́hráda ámu kpán dá, táme omebitíwíé mótso. ⁶Simon Petro lóɔ́tu mu, ɔ́ɔ́tsun bitíwíé ntsán ámutso, olowun ɔ́hráda amu da. ⁷Olowun ɔ́hráda ámúú bɔ́putso mu nwun ámu é, ilokuntá ida ífúntso. ⁸ɔ́kasípú amúú olegyankpá wíe unu ámu é lébitíwíé mótso, wun ɔ́hráda ámu pú mú ámúú bɔ́putso mu nwun ámu alí olohogyi. ⁹Bré ámutso á, Bulu asun wanlínhé amúú ɔ́leblí ɔ́béé, ilehián ání Yesu ɔ́bɔ́kusú tsú afúlitso ámu mɔ́kónyá wánkí amú. ¹⁰Beyinkí yó wóyí.

Yesu lwaɔwanle Súná Magdalayintse Maria

(Mateo 28:9-10; Marko 16:9-11)

¹¹Táme Maria lési ɔ́lí opulákpá unu odesú. Bréá odesú a, olobun kí ɔ́bɔ́ ámutso. ¹²Unu olowun *Bulu-abɔ́pu abanyɔ́ ání bɔ́wa atadié futútúútú, butsie ɔ́tíné ámúú bɔ́pu Yesu fúli tswi amu. ɔ́kɔ́le tsie mu adianwun, ɔ́kɔ́le tsie ayabiasí. ¹³Befité mu beé, “Amú yín, nkálí igyi sù fudesú?”

ɔ́lele mú ɔ́nɔ́ ɔ́béé, “Balé mí Wíe náti. Mmeyín ɔ́tínéá bapú mu yótswi!”

¹⁴ɔ́leblí tá á, ɔ́ledamlí kí ɔ́ma. ɔ́kí a, Yesu líí mu ɔ́ma, táme ɔ́mebiá Yesu ní. ¹⁵Yesu léfuté mu ɔ́béé, “Amú yín, nkálí ígyi sù fudesú? Ma fudedunká?”

Mu mú ɔ́kí ání ndobíí amutso agyóbmá ɔ́yɔ́pú ní. Mú su ɔ́lebláa Yesu ɔ́béé, “Aní sí, ní fúlatso mu yótswi ɔ́tineku á, suna mí, anyetsu mu natí.”

16 Yesu lókpólí mu ɔ́bée, “Maria.”

Ɖledamlí ki, kpólí Yesu *Hebri ɔ́blíto ɔ́bée, “Rabuni!” (Mú asu gyí, “Osunápú.”)

17 Yesu lébláa mu ɔ́bée, “Mápu ibi da mi, tsúfé mmɔ́kúnyá yó ɔ́súsú mí Sí wá. Mboún nati yebláa mí apíó ámu fee, nɔ́yó mí Sí ání ogyi mli Sí wá. Nɔ́yó mí Bulu ání ogyi mli Bulu wá.”

18 Magdalayintse Maria léyebláa akasípú amu ɔ́bée, “Nawun aní Wíe!” Ɖlebláa amú asún ání Yesu lébláa mu.

Yesu lwiɔ́wanle Súná Mu Akasípú

(Mateo 28:16-20; Marko 16:14-18; Luka 24:36-49)

19 Kwasieda ámu ntópwesu á, akasípú amu befia. Befin obu wá iwi, tsúfé buɔe Yudafɔ ahande amu ifú nya. Inu á, Yesu lébelú amú nsiné, ɔ́lebláa amú ɔ́bée, “lwi ilwíi mli.” 20 Ɖlebláa amú alí tá á, ɔ́ɔpu mu ibito pú mu abunto súná amú. Ansí légyi amú, tsúfé bawun amú Wíe. 21 Yesu létrá bláa amú ɔ́bée, “lwi ilwíi mli. Alí ámúbú mí Sí lawá mí ámu a, alí nde mli wa ní.” 22 Inu ɔ́ɔɔɔn ɔ́ɔ́é fú wólí amúsú, bláa amú ɔ́bée, “Mliho Ɖɔ́ɔe Wankíhé amu. 23 Ní mlesí ahá lakpan kíé amú á, Bulu lasíkíé amú. Táme ní mli mésikíé amú á, Bulu méesikíé amú.”

Yesu lwiɔ́wanle Súná Toma

24 Bréá Yesu léba a, amúto ɔ́kuleá butetí mu Toma, butelátí mu Tabí má inu. 25 Mú su akasípú atráhe amu bebláa mu beɔe, “Anilawun aní Wíe!”

Táme Toma lébláa amú ɔ́bée, “Ní mmɔ́kúwun mu ibito ndatobi nɔ́ ámu, kpíé osrebi wá móto, kpíé ibi wá mu abunto ɔ́ɔ́ ámutɔ́ á, mmóohogyi ekekeke.”

26 Nkekwe ɔ́ma a, akasípú amu betrá fia obu ámutɔ́. Alí eke ámu mú á, Toma bú amúto. Befin obu ámu, táme Yesu lébelú amú nsiné, bláa amú ɔ́bée, “lwi ilwíi mli.” 27 Mú ɔ́lebláa Toma ɔ́bée, “Ki mí ibito, kpíe osrebi wa nfi. Kpie fú ibi wa mí abunto. Si nwéen gyí, afuhogyi!”

28 Toma léle mú ɔ́no ɔ́bée, “Mí Wíe pú mí Bulu!”

²⁹Yesu lébláa mu ɔbéɛ, “Ani á múbú fawun mi á mu su fahogyi lóó? Ansi bégyi ahá á múbú bumɔpu amú ansíbi wun, asa bohogyi amu!”

Tsá Svá Bɔwanlín ɔwulú Ánfi

³⁰Yesu létrá bwe osúna tsɔtsɔtsɔ mu akasípú amu ansítú ání bumɔwanlín wá ɔwulú ánfítɔ. ³¹Táme bawánlín íni, méní mlóhogyi ání Yesu gyí Bulu mu Bi Kristo amu. Asón ánfísu hógýi ɔbéha mlénya nkpa ání itamatá mu idátó ní.

Yesu Iwɔwanle Súná Akasípú Abasiénó

21 ¹Íni ɔma a, Yesu létrá le iwɔ wan súná mu akasípú Tiberia ɔpu^t ɔnó tsun ɔkpa ánfísu. ²Simon Petro mua Toma ání butelátí mu Tabí, Nataniel, otsú Kana wúluá íbu Galilea ɔmátó, Sebedeo abí á mu pú akasípú abanyó é befia. ³Simon Petro lékla amú ɔbéɛ, “Nɔyó ɔpusu yéle aye.”

Bebláa mu beɛ, “Ani é abóbuo fu yó.” Íni su boyówie ɔkluntó nátí. Táme betsiá ntsusu onyé á mu féé, bumenya tɔtɔ. ⁴Bréá ɔyí íbá beke a, bowun ɔku líí ɔpu amu ɔnó. Bumebi ání Yesu ni. ⁵Mú Yesu léfíté amú ɔbéɛ, “Mí anyawíe, mlíménya tɔtɔ?”

Bele mú ɔnó beɛ, “Ee!”

⁶Yesu lébláa amú ɔbéɛ, “Mlitswi asawu amu wa gyɔpɔsu fún, mléle aye.” Mú su bɔtswi wa unu. Aye lobulá asawu amu, bumetalí bítí mú lé.

⁷Mú ɔkasípú amú Yesu tɛhíé dwé á mu lébláa Petro ɔbéɛ, “Ani Wíe Yesu ni!” Bréá Petro lónu ání ani Wíe Yesu ni á, olotsu mu atadie mla iwɔ. (Tsúfé ɔlowóí mu atadie tswi), olotu wíe ntsu ámutɔ gyuaa, ɔdeputí ɔyó Yesu wá. ⁸Táme akasípú atráhe amú búbu ɔkluntó á mu bebitía asawu amú aklemetí búbu mú á mu ba otsubúnɔ, tsúfé buma ífó ɔpu ɔnó unu. Mú ífótó bóbwe fé ayabi lafasa (300). ⁹Bréá bowie ɔpu ɔnó á, bowun ání bawá agyawunu ogyá, buɔe iye tɔ músú, bodobodo é da mú asi. ¹⁰Mú Yesu lébláa amú ɔbéɛ, “Mlile aklemetí á mú mlílalé á mu ku ba.”

^t21:1 Butetráa tí mú Galilea ɔpu.



Yoh

*Bebítia asawu amú aklemetí bubo mó ámu
ba otsubúno. (Yohane 21:8)*

11 Mú su Simon Petro léyinkí dú wíé oklon amuto, ɔleyébútia asawu amú aklemetí akpɔnkpɔnti bubo mó ámu botswi ɔpu ɔno. Aklemetí ámu bugyi lafakule aduenu-sa (153). Íniá butso ó á, asawu amu metúú. 12 Yesu létí amú ɔbéé, “Mlibegyí ató.” Amúto ɔkuku métalí wá klon fíté mu ɔbéé, “Ma fugyi?” Tsúfé bebi ání amú Wíé ni. 13 Yesu lótsu bodobodo amu há amú, olotsu aye amu é há amú.

14 Bulu lókusúa Yesu tsú afúlitɔ ɔma a, íni gyí otse saasi ání ɔlele wɔ ɔwan súná mu akasípú amu ni.

Yesu Mua Petro

15 Bréá begyi nyanki atogyihe amu tá á, Yesu léfité Simon Petro ɔbéé, “Yohane mu bi Simon, futɔdwé mí dun fú aba ánfí lóó?”

Petro léle mó ɔno ɔbéé, “Ee, mí Wíé, fuyin ání ntɔdwé fú.”

Yesu lébláa mu ɔbéé, “Kí mí akúfabi amusu.” 16 ɔletrá fité Petro otse nyɔɔsi ɔbéé, “Yohane mu bi Simon, futɔdwé mí?”

Petro léle mó ɔno ɔbéé, “Ee, mí Wíé, fuyin ání ntɔdwé fú.”

Yesu lébláa mu ɔ́bée, “Kpa mí akúfa amu.” ¹⁷Yesu léfité mu otse saasi ɔ́bée, “Yohane mu bi Simon, futɔ́dwé mí lélé?”

Ulehan Petro, tsúfé otse saasi Yesu lafité mu ɔ́bée, “Futɔ́dwé mí?” á. Mú su ɔ́lele mú ɔ́nɔ́ ɔ́bée, “Mí Wíé, fú onutó fuyin tógyítɔ́. Yéé fuyin ání ntehié dwé fú!”

Yesu lébláa mu ɔ́bée, “Kí mí akúfa amusu. ¹⁸Ɔ́nɔ́kwali nde mli bláa. Bréá fúgyi ɔ́yasubi á, fú onutó futetáli tsú fú atadie híhie iwi, kúsú yó ɔ́tínegyíɔ́tíneá fudeklé. Táme ní fɔ́bwé oyin dehen a, fétinkí ibi, há ɔ́ku ɔ́bédidá fú ató, kpá fú ya ɔ́tíneá fumedékle.” ¹⁹(Yesu lébli asún ání, púsúná ɔ́kpa ání Petro ɔ́bótsun músú wú pówá Bulu numnyam.) Iwu ɔ́lebláa Petro ɔ́bée, “Buo mi!”

Yesu Mva Ɔ́kasípúá Ɔ́tehié Dwé

²⁰Petro lédamli kí a, Yesu ɔ́kasípú amú ɔ́tehié dwé ámu buo amú. (Múgyí ɔ́há amú ɔ́leyinkí kpísá Yesusu ntúpwe ató ogyíkpá, fíté mu ɔ́bée, “Owíé, ma ɔ́béle fú há?” ámu ni.)

²¹Bréá Petro lówun mu a, ɔ́lefité Yesu ɔ́bée, “Mí Wíé, ntu ɔ́béba oyin ání é́sú?”

²²Yesu léle mú ɔ́nɔ́ ɔ́bée, “Ní ndeklé mbée otsía nkpa yófun bréá néyinkí ba a, fú asún igyi? Fú mú buo mi wule!”

²³Asún ání ulekleí wá Yesu abúopu amuto, ání alí ɔ́kasípú amu mú móowu. Táme Yesu mébli ɔ́bée, omóowu. Blí ɔ́lebli ɔ́bée, “Ní ndeklé mbée, otsía nkpa yófun bréá néyinkí ba a, fú asún igyi?”

²⁴Múgyí ɔ́kasípúá olowun íni féé, ɔ́lowanlín mú tswi ni. Anyin ání mu asun blíhé anfi igyi ɔ́nɔ́kwali.

Ɔ́nɔ́mɔ

²⁵Ató tsɔ́tsɔ́tsɔ́ utráa bu unvá Yesu lóbwé tsía íntɔ́. Ní ɔ́wanlín mú féé wá nwlúótɔ́ ukule-kule a, tekí buménya nwlú ámu ɔ́yaíkpá ɔ́sulúv anfisv. Natóí tá.